

YOLYA YA EROOHO M'OKATHI AYA



Waamini paahi, waamini paahi,
Sothene sinniweryaneya, paahi . . .

Sai, vano sa:

Vano kinnaamini, vano kinnaamini,
Sothene sinniweryaneya, vano kinnaamini;
Vano kinnaamini, vano kinnaamini,
Sothene sinniweryaneya, vano kinnaamini.

Nikhale neemenleene vano, ni miru sahu sowuurama.

Pwiya, ela ehikhale esipo paahi, masi ekhale eyiixeryo ene ya murima ahu oniipa, “Vano kinnaamini!” Awiixutti yaahihimya emara emosa, vaamanly’awe Yesu opaka miteko sinci-ene suulupale, awo khwira, “Pwiya, vano hiyo ninnaamini.”

Yesu khwira, “Vano munnaamini?”

² Awo khwira, “Hiyo ninnaamini wira Nyuwo moosuwela sothene ni khamunthuna hata mutthu wira owiixuttiheni.” Vano, Tithi, ohiy’ula hiyo ninnisuwela wira Nyuwo khamunthuna mwiiixuttiho ahu, masi hiyo ninnitthuna Wawinyu. Tivo hiyo ninvekela wira Nyuwo muniixuttihe moota wo olompa, moota wo okhala, ni moota wo waamini. Munivahe, Pwiya, muhina mwa mutek’ola wo okokhorela ohiy’ula. Yakhala etthu ennihaleela, munivahe, Pwiya. Hiyo ninvekela mwa Nsina na Yesu. Amen.

³ Miyo koosuwela wira anci-ene a nyuwo murimweemela-tho ohiy’ula. Ni, vate, koophwanya makhuru yaahimya wira khayaawerya ovolowa, nto awo anaawiriyana araatiyu aya mukaaroni soohiyana-hiyana. Nto vano hiyo ninrowa wiilipiha wira nikhalihe woowaakuvaxa ntoko sinwery’ahu ohiy’ula, Ttiminku ohiyu, hiyo ninvahererya wira naavekelele aretta, okhalana eliinya ya mavekelo naweryaru othata emosa va. Masi hiyo ninvahererya mutek’ola ohiy’ula wira naavekelele aretta.

⁴ Ni miyo kintthuna wira nyuwo mukhale oolipiheriwa vano mu. . . Iyaakhulelo iya Soowaarya sa Muluku, mwa Waamini, Waamini w’okathi ula. Waamini! Onrowa otthuneyaxa waamini ohitonko aya okhala okathi p’ukathi mukina, maana ola ohaana okhala waamini wo okuxiwa, okuxiwa oroihiwa osulu. Nto siiso hiyo nintthuna wira nyuwo mwaamini ohiy’ula sothene moonaly’anyu, mwiiwaly’anyu, Masu muniw’anyu olaleiwa, i—ithoonyeryo ni mitikiniho nyuwo munoonaanyu wiiriwa. Hiyo nintthuna wira nyuwo muthukumanye sothene iyo mmurimani mwanyu, ni mutthokelele, vakhala wira owo Mulukuu wala nnari.

⁵ Eri ntoko Eliseyo a khalayi, iirale, “Muluku akhala Muluku, weso mmurumeele Yoowo.” Ni Yesu akhala eriyari ya itthu sothene wa muKristu, nto kinoona wira hiyo naahaana ohiya itthu sothene sikina niphitaane ni Yoowo. Muupuwele, Owo t’okhanle Eriyari, Owo t’okhanle Ettheneeri y’Onikela epheyo, Owo ti Nuulumo nookiserya, Owo t’Omaliherya. Nto Owo akhala Ettheneeri y’Onikela epheyo. . . Eri etthu emosa paahi enrowa othoonya ettheneeri y’onikela epheyo, ekhanle epuusul’anyu nyuwo oneettan’anyu mphareya. Nto Epuusula miyo entthun’aka wira nyuwo mweettane ti Masu, vano Masu okathi wothene animuthoonya Yoowo.

⁶ Ni hiyo ninoona ntoko wira ninvira okathi mmosa muulupale wa muxankiho ni weereriwa, ovelavela w’okathi ni muxankiho eriyari sa ilapo, ni khula enamuna sa itthu sinkhumelela, ni imara sikina miyo kinikhala oorihwa moowiixa ntoko. . . Khula nipuro ninwehaaka, ninkhala ntoko va. . . mukalawani mphareya. Ni koovahiwa muteko wa Ekalawa. Nto ninrowa ovuluwa sai? Nto va ninrwa nimosa ni econcoro yootteela, nuulupale ovikana ekalaw’aka imara emiya. Masi hiyo nnoorowa ovira vasulu vaya, khula nimosa. “Hiyo nootepa oxintta mwa Yoowo.” Mukhulupale, Mukhulupale Oomalela, t’onvarela mukhoyi okerekhere wa ekalawa, Owo onookuxa mpakha epantte ekina. Hiyo nnoovira vasulu va khula nimosa a yaawo.

⁷ Vano, ohiy’ula, wira naakuve noohiyeni okhuma vahilekenle. . . Hiyo ninnoottittimihani mwaha wa mikwaha sanyu soorakama, ni sikina, ni moota orin’anyu weettiha, ni wiivaha orin’anyu wira. Nto, moone, eyo ennikiphalaha paahi otthuna okhala ni otthikela kilavulaka ni kiiraka itthu sothene sinwery’aka wira kookhaliheryeni. Masi kaakhalaka va miyo kinnitthuna wiilipiha mwa sothene sinwery’aka, wira kivahe mukhaliheryo mwaha w’okathi ula hiyo oryaahu vano va. Vano nyuwo mukuxe. . . Nyuwo mwaavahaka atthu etthu yoowaatta khula okathi awo khanwerya wuupuwela. Nyuwo—nyuwo muhaana paahi okuxa etthu emosa n’ukhalaha ohoolo w’atthu mpakha awo woona eyo. Vano nto awo yiiwaru sana eyo mmurimani mwaya, nto awo ano. . . nto nwiixutiheke etthu ekina. Murima—murima paahi nirowaka.

⁸ Vano, nvekeleke ni mukhaleke oowiilipiha, ni mwaamini vano ohiy’ula wira nvonihawe. Miyo kinoona wira khokhanle hata ohoverya mmuruni mwanyu mwaha w’okathi onikhal’ahu. Miyo kookupali wira khokhanle ohoverya mmuruni mwanyu yo wira Muluku ori eriyari y’atthu Awe wala nnari. Miyo kookupali wira nyuwo othene munaamini iyo. Nto miyo. . . Khokhanle hata ohoverya mmuruni mwaka wa yeeyo. Ni miyo—miyo—miyo kinnaasuwela atthu aka, apatthani aka, apatthani a Kristu, aana a—a Kristu, annaamini iyo.

⁹ Ni ennikiruuhela osiveliwa vaalupale ophiyererya woona vaasuweleyaka wira wookhala Mutthaka onikhuma wa Muluku,

ni annivahiwa atthu ni owoona atthu waakhulela Yoowo. Vano nyuwo munooweha ottuli ni wira, “Kooxukhuru, Tithi.” Oh, otthapa xeni onkhala nto owoona aana elyaaka Yolya aveleelihiw'aya! Nyuwo munnisuwela wira eyo yaari yoowoona miyakha sivinre, vaava va mutapernakulu? Ti yeeyo, “Yolya y'Ekumi.” Munna Neville, nyuwo munnuupuwela eyo, khino. Okathi w'owerya!

¹⁰ Vano nrowe nikhunle, mwaatthunaka otthara osommwa wala olepa, paahi...Miyo nkinkupali wira yaamukhala yooreerela okhalana muteko w'okokhorela ohikhanle osommwa wa Masu a Muluku ni ohimya sootaphulela kamosa kamosa, sinto onrowa okhala muteko w'ovoniha wala enamuna ekina. Hiyo othene ninnisuwela. Khakhanle aletto eriyari ahu, wona waka. Masi hiyo othene ninnisuwela ele ekhanle ovonihiwa. Kahi etthu mutthu oniwiirelaaweni; t'ile Muluku owiireny'aweni. Woopowa ori mwa enamuna emosaru. Etthu emosa paahi, ti, owiirha atthu waamini wira Ekeekhahi. Ni Muluku onniixuttiha muhina mwa Masu Awe ni onniwooniherya ale anrowa waamini Yaawo, okhala wira Owo oohimya wira, “Sothene sinniweryaneya w'ale anaamini.”

¹¹ Nyuwo muniira, “Khiyaavo hat'etthu ehinweryaneya ni Muluku.” Nyuwo munnaamini iyo? Khiyaavo hat'etthu ehinweryaneya ni nyuwo, nave. “Okhala wira sothene sinniweryaneya w'ale,” (Muluku Mutthuu) “w'ale anaamini.” Munnona? Vano khiyaavo hat'etthu ehinweryaneya ni nyuwo, wa nyuwo, nyuwo mwawerya-ru waamini paahi.

¹² Vano Mamwene Oopacerya, ekapitulu 17, kintthuna kisome iversikulu thanu na piili soopacerya, Apwiya yatthuna vale.

Vano Eliya muTixibi, yoowo aari a oGalaadi, aahimuhimeerya Akhabi wira, Ni nsina n'APWIYA Muluku a Isarayeli akumi, yaawo oryaaka ohoolo waya, khunikhala-tho okame nnakhala epula miyakha iya, vooikhala nnuulumo naka.

Vano nsu n'APWIYA naahimurweela yoowo, niiraka,

Nvenye va, murukunuwele onikhuma nsuwa, murukunuwele onikhuma nsuwa, mwaipithe vakhiviru va muro Kerithi, ori ohoolo wa muro Yordani.

Nto enookhala wira, munrowa owuryaka muro yoowo; ni Miyo kihaaruma anakhuku wira yoolyiheni weiwe.

Nwehe, “wira yoolyiheni weiwe,” kahi nipuro nikina. “Weiwe!”

Vano owo aahirowa khwiira ntoko APWIYA, kiireke nsu n'APWIYA: maana owo aahirowa khukhala vakhiviru ni muro Kerithi, ori ohoolo wa muro Yordani.

Vano anakhuku yaanimuruuhela ephawu ni enama voosiisu, ni ephawu ni enama makaaripi; vano owo aaniwurya mmuro.

Nto vaahiiraneya nuvira mahiku vakhani, muro waahuuma, okhala wira khiyaakhanle-tho epula mulaponi.

¹³ Apwiya yincererye iparackha Saya osoma wa Masu Aya. Nto vano, ohiy'ula, kintthuna kikuxe yoosoma okhuma vaavo, eniihaniwa, "Yolya ya erooho okathi Aya." Voosiis'ula hiyo naahikhalana ni—nisomi nimosa mwa—mwa "Omuwarela muteko Muluku, ahiso weererya omuwarela Owo muteko ohikhanle. . .-ohikhanle okathi, emara, nipuro, wala mutthu." Nto vano ola ti: *Yolya Ya Erooho M'okathi Aya.*

¹⁴ Profeta ola, Eliya, hiyo ninsuwela vakhani ya yoowo. Masi hiyo noosuwela wira aari murumeyi a Muluku, ni murumeyi a Muluku a okathi ule.

¹⁵ Nto Muluku oorumeela Eroho Awe yaari mw'Eliya, imara tthaaru, ni oohimya orumeela-tho imara piili; imara thanu, wa mahala. Owo aahirumeela Eyo mw'Eliya; Yaahirwa mwa Eliseyo voowincereriwa vanli; yaari mwa Yohani Mpatisa; ni ehaana orwa wira emooniherye Mwaakameliwa Mmalapo; ni enoorwa ni Moise wira yaaroihe aYuta owaani. Ti yeeyo. Imara thanu Muluku onihim'yawe wira onoorumeela Eroho y'Eliya, ni ohiira imara tthaaru.

¹⁶ Vano, profeta ola muulupale, hiyo khaninsuwela otthu onikhum'awe. Hiyo ninsuwela wira owo aari muTixibi. Masi moota siruulyaawe. . .

¹⁷ Hiyo ninsuwela vakhani sa maprofeta. Khaninsuwela otthu awo onikhumasaaya. Voorikarika. . . Ntoko, miyo nkinsuwela ya hata mmosa aakhumme mukereja wala aarina nihimo ottuli wawe. Yaari atthu pure paahi yaari oohoova, ni, imara sinciene, oohisoma. Ni awo khanatoko opaka hat'etthu elepaka, mmansaya. Yesaya ni Yeremiya, anli a yaawo, yaahilepasa itthu kamosa kamosa, masi mulopwan'ola muulupale Eliya khanatoko olepa hat'etthu. Anci-ene aya khiyaalepasa; khino awo khiyaaweryasa olepa. Masi yaari atthu oolipa murima. Khaavo mutthu mBibiliani ntoko maprofeta ale a khalayi. Awo yaahitharimula omwene, mamwene, atthu, ikereja, ni itthu sikina sothene, nave khukhala oolipa mwa Masu a Muluku, ni Muluku aahooniherya wira awo yaahikhalana exariya. Awo yaari atthu oolipa murima sana.

¹⁸ Nto Eliya ola aari mmosa ootepexa ominyala wa othene aya. Owo aari mutthu a mothakoni. Owo aakhumme mothakoni; aakhala mothakoni. Bibilia ohimye wira owo aawaraka manri. Owo aarina esapala y'epwittipwitthi iivitikelenleene, ni nipattuuxa n'ekattakha, y'esapala ya khamelo atitenleene,

vanci-ene. . . ipwetupwetu owiitho wawe, vano kinnitthokelela wira aari mutthu ooneya okhala a mutakhwani, ni w'omuweha.

¹⁹ Masi hiyo khani. . . awo othene khakhwaanse. Awo othene kha—othene khakhwaanse. Mahiku a Muthukumano w'oNicea, anci-ene a nyuwo atthu musomme *Muthukumano w'oNicea wa Ekereja ya Khalayi*, okathi awo yaatthun'aya opaka mutthenkeso vaavo ni okurumula ikereja sothene sikina, ni okhaliha emosa, okathi awo yaarin'aya Muthukumano ole w'oNicea, atthu oominyala ntoko Eliseyo yaahirwaasa vaavo ekhumasaka mothakoni, elyaasaka malaxi paahi; atthu aalupale oominyala. Masi makhulupale, ale yaari mapuro oosulu, vathi va Constantino, n'akina, khwaamaaliha masu aya. Okhala wira awo, eryeene maprofeta, yaanisuwela wira epyo y'etriku ya Ekereja Mwaakameliwa yaahaana omorela mutthayani, vamosaru ntoko epyo y'etriku ya Mutheli yaamorenly'aya mutthayani. Ni khukhala memmo miyakha ikonto sene.

²⁰ Tivo enlempwaaya muliivuruni olelo, “Ori vai Muluku yoole oomaala aawerya weemela n'uweha, owoona anamwane yiiviwaka, ni athiyana ekheriwaka kapatti-kapatti n'akharamu, n'ukilaathi osulu khuhiyahimya hat'etthu mwaha wa yeeyo?” Awo khansuwela Masu. Wira epyo y'etriku ehaana omorela mutthayani. Moota xeni Muluku a exariya aawery'awe weemela ni omuweha Mwana Awe Ene okhwa n'usenyeriwa, ni itthu sikina? Masi eyo entthariha Masu, ehaana okhala. Ni ti siiso siry'aya hata okathi ula.

²¹ Mulopwan'ola, owo aari mutthu muulupale. Owo aarina nloko n'atthu anatampi ohoolo wawe. Akhabi aari mwene, atithi awe ohinatthi owo yaari ootakhala. Opacerya Salomoni, aakhala mwene ootakhala atthariwaka ni mukina. Nto mulopwan'ola, Akhabi, yoowo aarumme miyakha miloko miili ni miili oSamariya, aari ootepexa otakhala wa yaawo othene. Owo vekeekhai aari ootthariha emwaavano. Owo aanaamini etiini, vekeekhai. Ni aarina itthu sothene mw'ettharihelo y'emw'avano. Owo aahikhalana maprofeta awe imiya xexe aHeperi, othene aya oosoma sana ni owiixuttithiwa. Muluku khunveeleliherya mmosa nave owo khuhimwaamini, vano owo aari Eliya.

²² Masi Eliya, muTixibi ula, aari mutthu a mothakoni. Kahi mutthu ooratta; owo aari mutthu a mutakhwani. Nto nihiku nimosa, Akhabi vaairaly'awe etampi mpakha Muluku vahaawery'awe-tho ovilela, Owo aahilavula n'Eliya mothakoni. Vano va owo onoorwa akhuruwelaka ephiro arowaka oSamariya, ntoko sinooniheryak'aka imara sinci-ene; alakela ipwetupwetu sootteela simeleleka owiitho wawe, muru wa ntari naaryakamo nsuwa, maitho makhani oophunyeya, ottuli iwe ni tootto mmatatani mwawe, atheyaka wiitho wawe, khurowa mpakha wa mwene a Isarayeli, khwira, “E. . . Hata okame khummora mpakha miyo kiihane.”

23 Muluku anivahe atthu siiso, moone, atthu ansuwela etthu eniir'aya ni SIISO ANIHIMYA T'APWIYA.

24 Vano, hiyo ninnoona wira owo ohinatthi wira ela, wira Muluku aahimwiihana. Muluku aahilavula ni yoowo ni, tivo, owo ahoovaawe hat'etthu. Owo khoova mutthaka awe, wira khiwaarowa wiiraneya; owo aanisuwela wira waamwiiraneya! Owo aanisuwela wira waari ntoko Masu a Apwiya, ni aanisuwela wira aari profeta a Muluku a okathi. Tivo sinto mwene aamurowa othikila muru awe, wala omuhela mukhatteya, etthu p'itthu yaarowa wiiriwa, khiyaavirikana wa yoowo; owo aarina muteko, "SIISO ANIHIMYA T'APWIYA," owiitho wene wa mwene. Mutthu xen'ula oominyala! Masi owo ohinatthi wira ela, aahihimya eyuumu ila yuulupale . . .

25 Maana Muluku khonihiya etampi ehikhummwe. Ehaana okhala ehukumu. Ereerelo xeni ekano erin'aya yaahikhalane e—ehukumu? Ereerelo xeni yaarowa okhala, wira, "ti yoovirikanyiha ikano ovira eluuxu eryeene yooxeerya," nave khuhikhala muulutha ottuli waya, wala ehukumu ottuli waya? Khayaarowa okhala ekano. Vano yookhala ehukumu mwaha w'etampi. Nto Muluku aapakaka ekano, nto ekano eyo—ekano enahononiwa, vano ehaana okhala ehukumu aya.

26 Nto elapo ela yaahihonona ikano Sawe sothene. Oh, awo yaarina ekereja yuulupale, awo yaahikhalana empa y'olompa-mo. Awo yaahikhalana atthu anci-ene oosoma. Awo yaahikhalana maprofeta elapo yothene, yaahikhalana ixikola sa yaawo, yaakumiheryaka ntoko maakina. Ni awo yaahikhalana maprofeta oowaatta, awo yaahikhalana ana—anamukottho oowaatta, awo yaahikhalana alipa a ikano oowaatta, ni awo yaahikhalana etiini yoowaatta, masi yaahirakamela Masu a Muluku. Tivo Muluku khumwiihana mulopwana mmosa aari ota wa khula maloko aya voomalela, khimuruma ni SIISO ANIHIMYA T'APWIYA.

27 Nto nkawehani moota Owo onaakhapelel'awe ale Awawe. Owo ohinatthi omuruma profet'ola ni mutthaka, Owo iirale, "Eliya, murowe mwamuhimeerye itthu iya Mwene Akhabi. Nto vano, mwaira vale, mukhume ohoolo wawe naanaanoru, maana miyo kootthokiha nipuro wira murowe okathi wa eyuumu. Miyo kinrowa wookhapelelani, Eliya, nyuwo mwalaleerya-ru Masu Aka paahi, mwiire paahi ele Miyo enooleel'akani wira mwiire."

28 Vano kinrowa olikanyiya muteko ola muulupale, ohiy'ula, wa Eliya ni okathi wa Eliya, ni okathi hiyo ory'ahu vano. Miyo kookupali wira ola mulikanyiho wooreera. Miyo kinnuupuwela ilapo . . . vaari wira miyo . . . hiyo naahikhalana okathi w'otthikela ottuli, masi kinthuna kihelele okathi munciene eliinya ya mavekelo.

29 Vano vaakhanle wira naamuwerya otthikela ottuli ni woona, Isarayeli aamukunxe Palestina mwa mulipiheryo mmosaru

hiyo nimukunx'ahu Estadu Unido ula. Hiyo niruule Estadu Unido ula khwaakhanyererya alipa yaari-mo, yaari aHinti, wira enivahe vano hiyo khikuxa elapo. Ni ti siiso Isarayeli aakenly'awe muPalestina, eettihiwaka ni Yoxuwa, eettihiwaka ni Muluku, khwaakhanyererya alipa yaari-mo wira yaavahe awo khikuxa elapo.

³⁰ Nto mamwene aya oopacerya yaari atthu oowerya: David, Salomoni, ni atthu aalupale. Mapresitente ahu oopacerya yaari atthu aalupale: Washington, Lincoln, n'akina. Vano vookiserya mapresitente kiireke mamwene khuyarowa ekhalaka ootakhala okathi wothene, nto vookiserya awo khumalela ni Akhabi ula. Olikana w'ekeekhai, yoolikana ni nihiku nahu. Nto atthu yaari a emw'avano vahaathun'aya wiiwa Masu a Apwiya.

³¹ Vano nyuwo munoowerya waatthokelela, atthu a emw'avano ntoko ale, etthu xeni murumeyi a Muluku ekeekhai ni ooloka aarow'awe wooneyaka wa yaawo. "Vano, owo aari mulolo, owo khaakhanle ni muupuwelo awe wooloka. Khivaaweryaneya okhala etthu iyo." Awo yaari anatiini, anatiini sana. Awo yaahikhalana axilopwana a xariya, awo yaahikhalana atthu a xariya. Awo yaari anatiini sana.

³² Vano owo aanisuwela wira yaamutthuneya okhala etthu yoomuvikana teologia oolimaleliwa, yaamutthuneya okhala etthu yoovikana—yoovikana mutthaka woolimaleliwa, yaamutthuneya etthu yoovikana olaleya Masu paahi, wira epharule mirima saya sa maluku. Owo aanisuwela wira yaatthuneya SIISO ANIHIMYA T'APWIYA wira eruhe ehukhumu ile w'atthu ale, tivo owo aanisuwela eyo okathi oronw'awe ni SIISO ANIHIMYA T'APWIYA. Vano yaari SIISO ANIHIMYA T'APWIYA. Onyemula Eyo, waari olamuliwa. Hiyo ninnoona yeeyo nihiku nahu, nave. Hiyo ninnoona yeeyo khula nihiku. Khiyaavo hat'etthu enihala woohikhala olamuliwa nyuwo mwavikana—ru mukaano ole wa mahala.

³³ Vano, nlikanyiho nne iwe, nenlo, miyo kinrowaaka omulikanyiha Eliya ni ekereja olelo, ekereja y'olelo. Okathi vakhani ohinatthi okhala olamuliwa, owo aahaakhela mutthak'ola. Eliya, owo aahooniherya, akhalaka ookhapeleliwa mwa erutthu, yoly'awe y'erutthu, okhala wira khayaarowa orupa epula vano, ntoko Masu a Muluku, mwa miyakha miraru ni miyeri mithanu na mosa, wala mpakha Eliya wiihana eyo. "Okathi p'ukathi nyuwo onihimy'anyu, Eliya, ti yoowo enrow'aya okhala." Tivo owo aahirowa mpakha wa mwene, khwira, "Khunrowa okhala hata okame mpakha miyo kiihane." Owo mu—muritti oniphiyerya, khuhiyo? Owo mutthaka oniphiyerya!

³⁴ Nto vano hiyo ninrowa olikanyiha yeeyo ni eyuumu ya erooho olelo. Vano, hiyo othene noosuwela, hiyo noosuwela sana, wira yookhala eyuumu yuulupale ya erooho mulaponi

olelo, naalavulaka sa erooho. Ni, nyuwo moosuwela, wira yaahihimmwa ni maprofeta, waarowa okhala okathi vakhani ohinatthi Orwa wa Nenli wa Kristu, yiirale wira, “Enimoorwa etala mulaponi, ni khenrowa okhala ya yolya paahi, masi yo wiiwa Masu a Muluku.” Vano nihiku nno naanaano va, “wiiwa Masu a Muluku eekeekhai.” Vano, eyo enlikanyiha eyuumu y'erutthu n'ile ya erooho.

³⁵ Etampi ni ohaamini, ni awiixuttihi oowootha ni a emw'avano mukereja, yaahiruuhela nipuro na olumuliwa nno onoorwa, onttharelana. Ni awo yaahihiya Masu a Muluku ni profeta Awe, ettharaka moolumo a teologia a vano a Masu.

³⁶ Nwehe va, p'ukathi ene yoowo Muluku onivenx'awe etthu okathi wothene. Okhala wira, Owo, okathi wothene, Owo khaniira hat'etthu mpakha owuupululele atthu, ni Owo okathi wothene onuupulula ni arumeyi Awe.

³⁷ Vano, masi Eliya, okathi ene yoola, aahikhalana nipuro na siiri Muluku aamurumme awe wira arowe. Eyo ti etthu hiyo entthun'ahu woona naanaano okathi vakhani nihinatthi okhalana eliinya ya mavekelo. Eliya aahikhalana nipuro na siiri naavaheriwe ni Muluku Mwaneeene. Vano, ekereja khenamuvaheke owo, mwene khamamuvaheke owo, owo khaaivanhe mmansawe, masi Muluku t'avahenrye nipuro na siiri wira Eliya alyihiweke okathi wothene wa eyuumu, vaavo yolya awe yaavaheriw'aya nihiku ti nihiku. Owo khaaphavela oxanka etthu yaarowa okhumelela meelo wala oxanka sinto yolya yaammala. Muluku iirale, “Miyi kihaaruma anakhuku nto awo animooyihani.” Etthu xeni yootepexa oreera, yoolikana ni nipuro nahu na siiri mwa Kristu.

³⁸ Okathi mwaataano wa molumwenkuni ni sothene siniiraneya olelo, siniiraaya, “Mahiku a miiriirya aamala.” Ikuru suulupale sa Muluku sookumihiwa mukereja. Awo khanikhala-tho, ntoko, awo kharina hat'etthu yookikhala “eyuuma ennyakula ni esimpi enruma.” Hiyo noosuwela wira eyo eekeekhai. “Ni okhala ntoko oothunku, nto ekhoottaka Owerya waya nave.”

³⁹ Eyo etthu emosaru yeeyo David iiraly'awe, voosiis'ula, ni ikaaro s'enyompe, orookhuma khuhiya Masu. Okathi Masu yooniheriwaaya ni yaavahiw'aya awo, awo khiyaatthunne; tivo, awo yaahikhuma mwa Yaawo.

⁴⁰ Yaari yeeyo atthu ala yiiraly'aya mahiku a Eliya, okhuma khuhiya Masu. Awo yuupuwela wira yaahikhalana Masu, masi khayaarina. Vano nwehe nto mu. . .

⁴¹ Okathi ene yoowo Owo aarowaawe waahukhumu ale oohaamini, Owo aahipaka ephiro ya mulipa-oowaamini. Etthu emosaru Owo oniir'awe khula okathi. Mahiku Owo aarow'awe ohonona elapo ni maasi, Owo aahimupakela ephiro yo woopowa Nowe. Mahiku Owo aarow'awe omupwiniha Ejitu,

Owo aahaapakela ephiro yo woopowa mphareya atthu Awe. Moota Muluku ompak'awe ephiro Awe! Nto vathu vahikhanle ephiro, Owo t'Ephiro ene yeeyo. Owo t'Ephiro yeeyo!

42 Vano hiyo ninnoona wira nri ohoolo wa mmosa wa . . . okathi muulupalexa wahala otonko aya osuwela. Vekeekhai kahi oxiiva orina epholovolo enaarya, erina muru mwa yeeyo, yaatthuneya wira nooveke. Ikereja ti saatthuneya wira nooveke. P'ukathi onkhal'ahu waatthuneya wira niwehaweheke.

43 Vano nwehe, masi Muluku aahipaka ephiro wira Eliya otthyawe eyo. Ni Owo oopaka ephiro wira an'Awe anaamini etthyawe vano, oviruwa ni itthu sintthuna orwa.

44 Okhala wira, Muluku khaakhanle okhala naxariya waalamula atthu ale ni waaveleeliherya ehukhumu, ni omupwiniha Sotoma ni Komora, ni omupwiniha Kafarnawu eriyari y'ephareya, ni ohukhumu maloko ale, ni Sotoma ni Komora, nave nto onihya hiyo wira etthu emosaru nave onihya oohihukhumu. Hiyo noolamuleliwa ehukhumu vekeekhaixa ntoko awo yaalamuleliw'aya ehukhumu. Vano hiyo ninniweha wira e . . .

45 Okathi itthu iya sikhumelenly'aya, etthunelo ya vano ya mahiku ale, Muluku aahimweemexa mutthu nihiku nle, kiireke, aahinvenxa mutthu, wira awanane ikuru, nave awo khiyaaiwelenle. Awo yuupuwela wira aari mulolo, "Owo aahipwetexa muupuwelo awe. Wira owo aari namathipelela paahi a khalayi, mulolo aakhuma mothakoni, oovahuwa mwaha w'etakhwa." Masi, nnakhala vo, owo aahikhalana Masu a Apwiya.

46 "Masu khanihimya ele Awo anlavlul'aya," awo aniira olelo. "Oh, ahe, Bibilia eliivuru y'ehantisi." Miyo kinoona wira nyuwo muhoona eyo, wira vano awo anihimya, wira, "Hawa khaakhunre masa, owo aakhunre e . . ." Yaari exeni? Kookupali wira . . . "Aari apriko," awo aniira vano. "Aari apriko." Vano nto, wira, "Moise khaaruunhe aana aavirihaka Ephareya Yooxeerya. Naari nikuttha nuulupale na ittheere, ekerekhere ekina y'ephareya ele, ni wira owo aavinre ephareya ya ittheere." Nto moota xeni maasi, m-a-a-s-i, yaavenny'aya ipantte soopiili, awo khuvirasa mutthayani moowuuma, nto? Oh, ethiru iyo! Masi, nyuwo moone, ninthuneya nihiku ntoko nenle wira niruue oviruwa wa Muluku w'atthuni. Ninniira eyo.

47 Awo aniira wira khiyaavo etthu iyo ntoko—ntoko iya . . . Hata atthu a mukereja khanaamini miiriirya. "Miyo kinimoovahani itoolare ekonto emosa," awo yiira, "mukoonihe mwiiriirya mmosa. Mukoonihe mwiiriirya mmosa!" Ahe, awo khayaawerya woona eyo saakhanle-ru itthu ikonto muloko soowiiriwa ohoolo waya. Vano, awo, awo khayaakhalakhala yoonaka eyo.

Nyuwo muniira, "Eyo ti yoohiweryaneya." Oh, nnari, kehiyo.

48 Eliya emara emosa aari oDotani, vano anakhotto a oSiriya yaahirwa khirukururerya muttethe, wira emukuxe, okhala wira awo yaanisuwela wira waari weiwo o—owerya w'elapo waaphwanyaney'aya, waari mwa namoon'ole. Vano, mwene. . . Mmosa a axilopwana khimuleela mwene a oSiriya, khwira, "Vano, nyuwo moosuwela, Eliya profeta, muTixibi, onnimuleela mwene a Isarayeli enihimy'anyu mpaani mwanu ni mwiitih." "

49 Khwira, "Murowe mwanvare mmiravo ole! Owo ti mutthu onnikattyamiha." Vano anakhotto othene a oSiriya khirukururerya ehoniwaka muttethe w'oDotani. Awo yaahirukururerya wothene.

50 Nto Gehazi, mu—murumeyi a profeta, khuvenya, khwira, "Oh, tithi aka, anakhotto aanirukururerya othene hiyo va. Hiyo nookutteliwa voomalela."

51 Owo khwira, "Vano, aakhala oowaatta ni hiyo waavikana ale ari n'awo." Munnona?

Nto Gehazi khuwehaweha, khwira, "Nkimmoona hata mutthu."

52 Owo khwira, "Pwiya Muluku, mutthukule maitho a mmirav'ole." Vano maitho awe khutthukuwa, nto miyaako sothene saasareiye Malaikha ni ikaaro seemenleene soorukururerya, Ikuru soohooneya.

53 Eliya khweetta mpakha vaavale, ni Bibilia ohimye wira, "Owo aahaapwexa maitho khuhiyoona." Owo khuruwa mpakha wa yaawo; awo yaari oohoona wa yoowo. Khikhuma khwira, "Munimwaavya Eliya?"

Owo khwira, "Ayo, nnimwaavya yoowo."

54 Khwira, "Murwe, kooleleni vatthu vary'awe," vano khwaaroiha mpakha vaaipitheliw'aya, vaavo vene anakhotto yaakhummy'aya khuphwanywa.

55 Vano, Bibilia ohimye wira, "Owo aahaapwexa maitho khuhiyoona." Eyo ennimaliha mwaha. Nto atthu ari oohoona mwa erooho olelo, enamwi Apwiya Muluku ekhuruwaka eriyari y'atthu ni wira khula etthu, ni itthu Awo yaahimmy'aya, awo nlelo khanwerya wona Eyo. Awo t'oohoona wa erooho; khammusuwela Muluku, khansuwela Owerya Wawe wuulupale. Vano, hiyo ninniweha wira awo yaahiira yeeya mahiku a Eliya, ni nlelo anniira olelo. Muluku onimwaapwexa maitho khuhiyoona. Awo annihimya olelo, wira, "Khasikhanle miiriirya, khiyaavo etthu ntoko eyo, yothene eyo wuukhuwaa."

56 Nto awo yaahimye etthu emosaru mwaha w'Eliya, okhala wira okathi owo aakuxiw'awe oroihiwaka osulu vano Eliseyo kuhala opuro awe, mmiravo mmosa, aahikhala nantari, mmiravo, anamwane khimutthara ottuli wawe, khwira, "Nantari mutokweene, muhirowenleni ni Eliya?" Moone, awo hata khayaamini Iyo wopaceryani, atthu, vaamanly'aya

wiiriwa itthu sinci-ene. Nto mutthu ula muulupale a Muluku aarookuxiwa aroihiwaka Wirimu n'ekaaro ya mooro, nave atthu nnakhala vo khayaaminni Iyo. Nto khwaaruma anamwane aya orowa ottuli wa mulopwan'ola ni wira, "Nantari mutokweene, muhiwelenleni?" Munnona? Vano nto profeta khwaatakhalihya anamwane awo, vano ekhaya y'ethiyana khuwiiva anamwane miloko mixexe n'anli a yaawo.

⁵⁷ Vano nwehe. Olelo, ntoko siiraneiyiye aya okathi ule, awo anihelela otaphulela waya mwa Masu. Vano, awo yaatthunaka wira eyo, eyo ti yawaya, masi awo aneererya onaaminiha hiyo. Bibilia ohimnye wira, "Masu ala a Muluku kahi ootaphuleliwa ni mutthu mmansawe." Muluku Mwaneene t'ontaphulela Mmansawe. Muluku onnilipiherya Masu Awe, ni owo ti mutaphulelo Aya. Ntoko imara sinci-ene sihimmy'aka, Owo aahihimya wopaceryani, "Okhale okokola," vano okokola waahikhala. Eyo khentthuna otaphuleliwa; yaahiiiraneya. Owo aahimnye wira, "Mwali harusi aamurupula," owo khirupala. Owo aahihimya wira Owo "aamurowa omwarena Eroho Awe," Owo khwira. Ni Owo aahihimya, "mahiku ookiserya," itthu Owo aarow'awe wira, vano Owo onniira! Khentthuneya hata otaphuleliwa; Muluku Mwaneene t'ontaphulela mmansawe. Hata wira atthu oovahuwa anihimya exeni, eyo khenimweemexa Muluku hata vakhani.

⁵⁸ Okathi Yesu aary'awe elapo ya vathi, Owo aahikhalana ohaamini wunci-ene wira onyakulihane ntoko sirin'ahu olelo, nto khino woovikana. Masi eyo khiyaamweemenxe; Owo aahitthikela apakaka ni avaraka muteko Awe, ni Muluku alipiheryaka sothene Owo siir'awe. Owo khwira, "Miyo nkiihiyo Meekh'aka. Atithi Aka ni Miyo nri mmosaru; Awo ankhala mwa Miyo. Nkiihiyo Miyo kinvara miteko, t'Atithi ankhala mwa Miyo. Nto kaahivareke miteko Saya, vano muhikaamini; masi Miyo kaavaraka miteko nyuwo nlelo khuhiyakaamini, mwaamini miteko." Munnona? Mwa moolumo makina, awo. . . "Mwaavavye Soolempwa," Owo khwira, "maana ti memmo munuupuwelel'anyu ophwanya Ekumi Ehinimala, ti osuwela Soolempwa. Ni Soolempwa, Seiyo, sinnikikhalela Miyo onamoona." Amen! Nuulumo xeni! "Ti seiyo, Soolempwa, sinoohimeeryani Miyo k'ani," Yesu khuhimya.

⁵⁹ Nto ti Soolempwa sinoohimeeryani okathi hiyo onikhal'ahu. Ni itthu sinoon'anyu wiiriwa, ti Muluku Mwaneene eriyari y'atthu Awe. Khiyaavo enwerya waahihimuxa alipa-ookhwa ohikhanle Muluku. Khiyaavo enwerya wira itthu Owo oniiir'awe vano woohikhala Yoowo. Maana Bibilia ohimnye wira, "Owo mmosaru nsana, olelo, ni mahiku othene."

⁶⁰ Vano hiyo ninnoona etthunelo ya vano y'atthu, nto, "Oh, mahiku aavira, khekhanle etthu iyo ntoko miiriirya. Atthu t'ovelavela othene voowiiniwa-vo murima."

61 Mmuwiriyanane Eliya owo, profeta, owuulumelela awo ni mateoloko aya. Nwehe, nwehe, owo aalavunle ntoko wira aari Muluku Mwaneene. Eliya aalavunle ntoko wira aari Muluku Mwaneene, “Okame khummora okhumaka wirimu mpakha miyo kiihane.” Amen! Ayo, mulopwana. Profeta aarookhala okathi munci-ene Ohoolo wa Muluku!

62 Maprofeta a Waataana wa Khalayi, wala khula okathi, okathi awo yaakhal’aya Ohoolo wa Muluku mpakha okhala Masu, Mutthaka aya ti Masu Yaawo. Nto, muupuwele, owo iirale, “SIISO ANIHIMYA T’APWIYA.” Nto okathi axilopwana ale yaakhalan’aya mitthaka iye saakhuma wa Muluku, ni yaakhala oowiihela-mo mpakha muupuwelo aya aneene. . . Hata wira waakhala woovirikana ni muupuwelo aya, hata wira awo khayaawerya wo—woona okhala ekeekhai. Masi awo yaalavula Masu a Muluku, “SIISO ANIHIMYA T’APWIYA.”

63 “Khenkhala hata epula mpakha miyo kiihane.” Oh, nuulumo xeni! Owo aarookhala Ohoolo wa Muluku ni okhala oolipiheriwa voolokaxa. Nto, muupuwele, eyo nave ennimutthara Amosi 3:7, “Apwiya Muluku khaniira hat’etthu mpakha Awo owuupululela arumeyi Aya maprofeta.” Khwira, “Khenrowa okhala hata epula enrupa!” Owo toko. . .

64 Awo yaahimutheya, awo yona wira aari mulolo, “Namathipelela ole!” Masi, moone, owo aarina SIISO ANIHIMYA T’APWIYA wira khayaarowa orupa epula. Ni, Muluku, owo ohinatthi wira eyo, Owo aamupululenle Eliya murumeyi Awe. Ni owo aari profeta oolipiheriwa, owooniheriwa, wira athu yaahaana orukunxa murima. Masi, ohiya vo, awo yaammutheya, khwira, “Oh, hiyo nookhalana epula eniphiiyerya! Micoma ti soosareya. Miratthi sinoovira vooreera.”

65 Bibilia ohimnye wira, “Khiwaakhanle nnakhala okame mwa miyakha miraru ni miyeeri mithanu na mosa.” Miratthi sothene ni maasi saahuuma, mapuro othene. Eyo khaari mulopwan’ole, owo aari Muluku alavulaka mwa mulopwan’ole. Owo aari ti “Miyu” aakhanle. Hiyo okathi wothene ninnisuwela. Vano owo. . .

66 Hiyo ninnoona wira mutthu aarw’aka, orummwe ni Muluku, oorummwa a Muluku, ni SIISO ANIHIMYA T’APWIYA eekeekhai, mutthaka ni namitthaka ankhala etthu emosaru. Okhala wira owo onrummwa wira amooniherye SIISO ANIHIMYA T’APWIYA, Nuulumo ni Nuulumo, tivo owo ni mutthaka awe ankhala mmosaru.

67 Mutthu a mmuromoleloni onikhaliheriwa ni muromolelo, owo ni ekereja awe ari “emosaru.” Teoloko vathi va teologia, oopakiwa ni muromolelo, owo ni mutthaka awe ankhala emosaru; ekereja ya teologia, teoloko. Voolikaneene.

68 Vano mutthu aarwaaka ni SIISO ANIHIMYA T’APWIYA, owo ni Mutthaka ankhala mmosaru. Ni okathi Eliya aaruuly’awe

ni SIISO ANIHIMYA T'APWIYA, owo ni mutthak'awe yaari mmosaru. Siiso ntoko Yesu, okathi Owo oruuly'awe, Owo aari Masu, Yohani Oowaarya 1. Vano Masu a Muluku ni namitthaka a okathi yaarisa etthu emosaru, okathi wothene. Ti yeeyo.

⁶⁹ Yesu aari Masu yaahimmwe. Owo aari ile maprofeta yaahimmy'aya wira yaamwiiraneya, "Mwali harusisi onoorupala amuyare Mwan'ola." Ottuli wu wopaceryani, Muluku aahaaleela, khwira, "Osuulu wa muthiyana ononyakela muru w'enowa, ni owo onoomuluma nnawo." Oprofeta ola wothene waahihimmwa. David anlaka, maprofeta othene akina moovirani w'okathi, elavulaka mwaha wa Yoowo. Owo aari Masu yaawo owooniheriwa! Aleluya!

⁷⁰ Vano munnoona vatthu vanttun'aka ophiya? Miyo koolavula ni nyuwo vowiiwanyeyaxa voosiis'ula. Khamunoono owerya wa Muluku mukumi Mukereja ekumi, Mwaakameliwa? Aretta annivonihiwa, alipa-ookhwa annihihimuxiwa, ale oorakala animweetta, yahoona annoona, Ehapari yooreera enookhuma ni owerya Waya, maana Mutthaka ni namitthaka ari mmosaru. Masu ari Mukereja, mwa mutthu.

⁷¹ Masu a Muluku yaari mwa Eliya okathi owo entty'awe mpakha iwe ni SIISO ANIHIMYA T'APWIYA, khwira, "Khenrowa orupa epula." Ole khaari Eliya; ole aari Muluku mwa Eliya.

⁷² Miyo koohimya imara sinci-ene, ntoko muthiyana mmosa a Siensia a oKristu aakihimenrye emara emosa. Miyo koohimya imara sinci-ene yeela. Owo iirale, "Mwenye Branham, nyuwo khamunreere wihihima ni Yesu."

Miyo khwira, "Miyo kinroromela wira eyo t'itthu emosa erin'aka waakhula."

Nto owo khwira, "Nyuwo muneererya omukhaliha Owo Muluku."

Miyo khwira, "Owo aari Muluku."

⁷³ Khwira, "Oh, Owo aari profeta, Owo aari mutthu ooreera murima, masi Owo khaari Muluku."

⁷⁴ Nto miyo khwira, "Ahe, mukoonihe Yoolempwa emosa enihimya wira Owo khaari yeeyo."

⁷⁵ Owo khwira, "Muliiivuruni mwa Yohani Oowaarya, enihimya wira Owo 'aahinla' okathi Owo oronw'awe vamahiye va Lasaru."

⁷⁶ "Ahe," miyo khwira, "vekeekhai, Owo aahinla. Owo aari soopiili mutthu ni Muluku. Owo aari mutthu, anlaka; masi Owo aahaana okhala Muluku wira aahihimuxe alipa-ookhwa." Ekeekhai. Miyo khwira, "Owo aari mutthu, avoliweene etala; masi aari Muluku aalyihaka atthu ikonto thanu, ni iphawu piili ni ihopa thanu." Ti yeeyo. "Owo aari mutthu, arupaka ottuli

wa ekalawa; masi aari Muluku mwa Yoowo aawerya omaaliha maasi.” Mwaha wa xeni? Owo ni Mutthaka Awe yaari mmosaru.

⁷⁷ Owo irale, “Miyo n’Attithi Aka nri mmosaru. Atithi Aka ankhala mwa Miyo.” Owo aari omalela wa oMuluku mw’erutthuni.

⁷⁸ Miyo kinoona wira yaari yoothananiha nihiku nlo, okathi waaruuh’aka *Okathi Mithanu na Miili wa Ekereja*. Voopacerya, miyo—miyo nkaawerya omutthokelela Yesu eemenleene vale ni ale...ni yootteela ele vasulu Vawe siisaale, yaahimya wira, “Ikharari Sawe saari sootteela ntoko manri.” Miyo nkaawerya osuwela sana mootu mutthu a miyakha miloko miraru ni miraru aarow’awe okhala ootteela ntoko nakhutu.

⁷⁹ Miyo khimulikarela teoloko mmosa oosuwela, teoloko muPentekosite, mpatthani mmosa ooreera murima oophenteya. Ahe, aari Munna Jack Moore. Owo mulopwana mmosa ooratta, oosuwela. Owo khwira, “Munna Branham, ole aari Yesu oovuwihwa. Ti siiso Owo ooney’awe numala ovuwihwa.” Nnari, nkaawerya waamini iyo. Nnari.

Miyo—miyo—miyo khwira, “Ahe, Munna Moore, kooxukhuru.”

⁸⁰ Kivolowa mpaani mme kikhala kilavulaka ni Muluku. Miyo kiweha moolumo oolikana aka wira kimuhokoloxerye Owo mwa Daniyeli, vaavo ohimmy’awe wira, “Vano owo aahirwa wa Humu a Mahiku ale Yoowo ikharari sawe saari sootteela ntoko manri.” Miyo khwira, “Pwiya, miyo—miyo—miyo nkinsuwela etthu yo ohimya, ni kihaana waakhula.” Vano, eyo yaari ehinatthi eka... ni muupuwele, Ikanyeryo Thanu na piili sihinatthi otthukuliwa, voophiyaka mwakha wala ovikana, khalayi. Miyo kaamuvekela iwe, “Pwiya, yaari exeni iyo?”

⁸¹ Vano miyo kiweha, eemenleene ohoolo waka, vano vale aaphwanyaneya mulopwana mmosa ni aari mphuki, ni owo aahiwara eperuuka yootteela. Aphuki a khalayi a mahiku a khalayi yaawarasaka eperuuka yootteela wira yooniherye wira aari mukhulupale oomalela.

⁸² Vano nto okathi omoonaly’aka Yesu ni eperuuka yootteela, miyo khwira wira eyo yaalipiherya paahi ekeekhai hiyo ensuwel’ahu, wira Owo ti Mukhulupale Oomalela. Muluku aahikhalela onamoona etthu emosaru oMwaako wo Orukunuwa, khwira, “Ola Mwan’Aka onimphentex’aka, mmuwiriyane Yoowo, Mukhulupale Oomalela!”

⁸³ Vano ottuli wu wopaceryani wa Ikanyeryo Thanu na piili, okathi Malaikha ale mathanu na manli akhurunw’aya ntoko epiraamite, khweemela vale khukilela wira kitthikele weno kilavule mwaha wa Ikanyeryo Thanu na pili iye, ni wira Owo aamukhala ni miyo, Owo aamukooniha etthu awo yaary’aya, itthu soorimeela. Miyo okathi wothene kaanuupuwela wira eyo yaarootthittiwa ottuli w’Eliivuru ni

wira yaari ethhu yahaalempwe muLiivuruni, masi khwiiraneya wira yaahisuwelihiwa wira Owo khaniira eyo. Kehiyo ethhu elempwe muLiivuruni. . . Eyo ethhu yaaipithihiwe muLiivuruni. “Maana khula mutthu onrowa okumiha Nuulumo nimosa Mmo wala wuncererya nuulumo Mmo. . .” Vano eyo esiirii yaari muLiivuruni okathi ula mithanu na miili sa ekereja. Khula mmosa wa seiyo wookumiherya e—esiiri, sothene y’opatiiso mmaasini ni itthu sothene iya sikina athu yiitapannye aya okathi woowaatta.

⁸⁴ Vano okathi awo awenly’aya, miweheryo suulupale okhuma oCalifornia, mpakha oMexico, oTucson, mapuro othene, ekumiheryaka elatarato Aya. Yaari yoowoona yootikiniha. Munna Fred Sothmann vale, okilanthi ottuli iwe, ni miyo ni Munna Gene Norman, neemenleene vaavale vene okathi Eyo ewenly’aya. Awo khikumihya elatarato, awo nlelo khansuwela ethhu yo ohimya mwaha wa yeeyo. Va okathi vakhani ovinre, athu othene yiiraka, “Nkawehani va. Ela enkhala so, ni mapupha ale a Malaikha, moota ary’aya ookhuneleya vale.”

⁸⁵ Nihiku nimosa, kirukunxelaka moonoo woolopwana, kiwehaka, vale aari Yesu Kristu oolikana sana ntoko Hofmann otonko awe ompaka Yoowo. Yaaphwanyaneya vale ni eperuuka yootteela, owehaka elapo ya vathi, ooniheryaka wira Owo ti Mukhulupale Oomalela. Erimu ennihimya, Bibilia onnihimya, Mutthaka onnihimya, sothene voolikana. Mukhulupale Oomalela, ni eperuuka yootteela; sinnooneya ireru Sawe sootteela vathi. Anci-ene a nyuwo muhoona elatarato ene. Hiyo nookhalana ottuli iwe. Murukunxele moonoo woolopwana paahi, mpararini, nwehe. Owo ori vale, voolikana ene ntoko saary’aya, sintoko aakumihiwe elatarato Awe. Yaawehiwa mpantte woovonyeya. Ehaana owehiwa mpantte wooloka. Nto Apwiya Muluku paahi t’anwerya wuupulula mpantte xeni okhanle wooloka. Murukunxele moonoo anyu woolopwana nto nwehe. Owo ori vale, voolikana ene, sintoko yaakumihiwe elatarato osulu iwe.

⁸⁶ Emara yoopacerya otonko aka omoona, Owo aakhala ntoko *Muru wa*. . . Hofmann. Nkaatonko woona eyo khalayi. Ni mutapernakulu wa Billy Sunday, miyakha mikina ohoolo waya, miyo khoona. Emp’aka khenakhaleke ehirina emosa wa ilarataro iya okhuma vaavo.

⁸⁷ Nto, osulu nno, ohimyaka wira Muluku ene yoowo kimonne aka mwa yoowoona ela nno, mwammiravo paahi nno vamphwanyaneya exikola ela, Owo aalattanne ni yeeyo. Nto Wirimu nno, miyakha miloko miraru ni miraru ohoolo waya, onnihimya, wira eyo ekeekhaii. Ti siiso Owo siry’awe; kahi ethhu yoohisuweleya ya ankhili a mutthu.

⁸⁸ Ntoko oVatikano, awo aakhalana m—m—Kristu mmosa ookumiheriwa elatarato iwe, ni munela mwaamukhaani wa ireru

sinrukurerya etora Awe, yoophiyaka epolekaata nuusu [13 mm] orekama waya, emmelela vasulu v'eyano Awe ni *siisa sa*, ni aniihana eyo Kristu.

⁸⁹ Eyo enikuupuxerya muratti mmosa muKreku kaamonne aka emara emosa mukatetrare ya khalayi, ooniheryaka ntoko Adamu ni Hawa yaalattanas'aya; awo yaakhalasa ntoko maxeni wala etthu siiso. Ti yeeyo muupuwelo w'erutthu onwery'aya otthokelela wa etthu ya erooho. Miyo kinoona wira Adamu aari mulopwana mmosa oophwanelaxiwa otonko okhala, ni Hawa aari muthiyana ooloka mwa mikhalelo sothene.

⁹⁰ Vano miyupuwelo s'erutthu sinkeliha Etthu iyo mwa ankhili aya mmansaya, vano Muluku onoovelela ni wuupulula Etthu ene n'Uwerya Wawe. Vekeekhai ti yeeyo yiiraneieye va mahiku a Akhabi.

⁹¹ Vano, hiyo ninnoona wira Eliya aaniwerya ohimya eyo okhala wira Mutthaka wa okathi ni Masu a Muluku, wala, namitthaka, Mutthaka—Mutthaka, ni Masu, saari voolikana ene etthu emosaru. Profeta, Masu, Mutthaka; namitthaka, Mutthaka, ni Mutthaka, saari emosaru. Yesu iirale, “Kaahivareke miteko silepeliwe aka Miyo, vano muhikaamini.” Eyo ti yooreera. Khula mutthu ni mutthaka awe ankhala mmosaru.

⁹² Tivo olelo atthu ahinaamini aya ovara miteko sa Muluku, okhala wira awo khankupali Mutthaka wa Muluku. Awo khanaamini Mutthaka.

⁹³ Masi ale anaamini okathi wa Muluku hiyo onkhal'ahu, itthu iya ti Yolya yoovithiwa. Muupuwele paahi, Muluku oroovitha Eyo mwa enamuna emosa awo anweh'aya Eyo nave khuhiyoona. Enamuna emosaru Eliya apwenx'awe maitho anakhotto aSiriya. Enamuna emosaru Muluku onimupwex'awe maitho mutthu-ooahaamini wa Yolya y'ekeekhai yooreera ya mwaana, mulipa-oowaamini.

⁹⁴ Ele yaamwiihan'aya Nowe, “namathipelela,” opakaka ekalawa, maitho awe yaahitthukuliwa wa Masu a Muluku ni natiri. Etthu ene yeeyo awo yiihanaaya onamathipelela, yaahimoopola Nowe ni ethhoko awe. Moore, etthu emosaru yeeyo. Etthu yeeyo atthu anthey'aya, ti etthu hiyo envekelel'ahu. Etthu yeeyo atthu aniihan'aya “ololo,” hiyo niihana “Yuulupale!” Etthu yeeyo olumwenku oniihan'aya “yuulupale,” Muluku oniihana “yoovahuwa.” Ni ele olumwenku oniihan'aya “yoovahuwa,” Muluku oniihana “Yuulupale!” Vekeekhai t'uvirikana wa Yooreera ni yoonanara. Yesu Kristu mmosaru nsana, olelo, ni mahiku othene.

⁹⁵ Muupuwele, owo aahikela nipuro nawe na siiri ni mutthokiheryo wa Muluku, ni wiihana wa Muluku, ni Masu a Muluku. Eliya aakenle nipuro nawe na siiri n'usuwela wa Muluku, otthokiha, ni wiihaniwa mwa makhalelo awe, ni

attharihaka Masu. Eyo yaahikhale enamuna hiyo enkel'ahu, miyo nkinsuwela moota onkel'ahu-mo.

⁹⁶ Vano nwehe, eyuumo ehinatthi opacerya, Eliya aahirowa nipuro nla na siiri mwaha w'ekumi awe. Nlikanyiho nene wira ehukhumu ehinatthi orwa mulaponi, Ekereja ehiihaneliwa okhuma, Mwaakameliwa oomala othanliwa, olipelelaka paahi ehukhumu ehinatthi orwa. Olipelelaka tu, ely'aka Yolya ya Muluku, epuhaka iparakha sa Muluku. Khula mutthu mwa muupuwelo awe wooloka onnisuwela wira hiyo nnoorowa nittharaka, hiyo nri okathi wa ehukhumu.

⁹⁷ Nkawehani! Munna Banks, anci-ene a nyuwo alopwana muri va ohiy'ula, mwaaphwanyaneya vamwaako vale voosiis'ule.

⁹⁸ Nto miyo kintthuna kilavule mwaha wa mwaako yoole, Ettiminku enirwa voosiisu, Apwiya yatthuna vale. Kookhalana muupululo muulupale, etthu emosa yuulupale ehinwery'aka okhala kihihimye ohiy'ula. Masi miyo kookhalana... Munnona? Ni eyo voohihiyererya, okathi wothene, etthu eniiraneya ettharelaka ekina. Munnona? Khenihiya wiiraneya, maana yaari SIISO ANIHIMYA T'APWIYA.

⁹⁹ Khula mmosa a nyuwo va, atthu ikonto ikonto sene mufiitani, mookiiwa ovenya ni wira, "SIISO ANIHIMYA T'APWIYA, enrowa okhala *sa ni sa*." Nto hata ixornale ni irevista soohimya okhala siiso. Awo khansuwela yothene eyo mwaha wa xeni, masi awo ahoona. Khansuwela exeni iyo, masi ahoona, ekhalihaka Masu keekhai pahi.

¹⁰⁰ Hiyo neemenle ohitto nno omuratthini, Nlaikha nne n'Apwiya khikhuruwa nihiku nle, miyakha miloko miraru ni miraru, ahiso yaari 1933, naakhurunwe khuhimya itthu Owo siiraly'awe. Kikhuma, nto atthu anci-ene yaaphwanyaneya okerekhere iwe, khwira, "Enihimyani iyo, Billy?"

¹⁰¹ Miyo khwira, "Eyo khayaari yawaka; yaari yawinyu. Miyo kinaamini; nyuwo nnari." Nto miyo kitthikela kirowaka paahi.

¹⁰² Vano pastore khukiirela, owo khwira, "Enihimya wira nyuwo, n'usoma wa ekalaase ya neethanu nenli, munoorowa mulaponi mothene waavekelela mahumu ni makhulupale ni mamwene ni itthu siiso? Nto, oh," khwira, "muliyale Eyo!"

¹⁰³ Miyo nkaawerya oliyala Eyo, yaahilempwa vamurima vaka. Vano va, nuvira miyakha miloko miraru ni miraru, itthu sothene Owo aahimmy'awe sihiiraneya voolikana ene ntoko Owo aahimmy'awe wira aamwiira. Owo ti Muluku khanvonya. Owo okathi wothene onnisuka Masu Awe. Owo... Muhikhalakhale muhoveyaka Yaawo.

¹⁰⁴ Vano, nwehe, owo aavolonwe ni otthokiha wa Muluku (osuwela khalayi ene), wiihana wa Muluku, ni Masu a Muluku, ni aavolonwe eyuumu ehinatthi orwa.

Vano, hiyo noosuwela wira ehukhumu ehanle orwa.

¹⁰⁵ Niryene vamwaako nihiku nle, Munna Banks Wood eemenle va, hiyo naawela vamwaako. Khino miyo kinoohimya-tho eyo, wira elipiherye waamini wanyu wa eliinya ela ya mavekelo enihalela wiiraneya minutu muloko, muloko ni mithanu sinttharelana. Miyo kaamweetta ohoolo wa Munna Banks. Owo aari. . . miyo kinoona wira owo aahimuhya Munna muthiyana Ruby okathi owo aawereiw'awe. Vano owo arwaaka ottuli waka, kaahona owiitho wawe, oxeerya. Kiweha ottuli. Miyo koono wira mwaako waari wo omurikela vakhani wira owo awele, tivo miyo kaavukunly'aka weetta. Mothakoni mwene mme, niwelaka miyaako *siisaale*, vaavo Malaikha a Apwiya jaarwaans'aya. Hiyo naarowa nittharaka epante yeele nto, weiwo Awo jaarwaans'aya miyeri vakhani eyo ehinatthi.

¹⁰⁶ Nto okathi waawel'aka mwaako, Eroho ya Muluku. . . Okathi orukununwe aka, kiweha vasulu vamwaako, Owo khwira, "Muttotte nluku nlo, mmuhimeerye, 'SIISO ANIHIMYA T'APWIYA, munimoona Ovuwa wa Muluku iwora vakhani sinttharelana."

¹⁰⁷ Miyo khuttotta nluku, khwira, "Munna Banks, miyo nkinsuwela mwaha aya," karihela osulu, nto miyo khwira, "SIISO ANIHIMYA T'APWIYA, munoorowa woona ovuwa wa Muluku."

Owo khwira, "Eyo yaahimya mwaha wa Ruby?"

¹⁰⁸ Miyo khwira, "Nnari, miyo nkinoona wira etthu enihimya mwaha wa nyuwo, Banks wala Ruby, hata mmosa. Miyo kinoona paahi wira Eyo yaahimya paahi, 'SIISO ANIHIMYA T'APWIYA, yookhala etthu enrowa wiiraneya."

¹⁰⁹ Nto voosiisu aya okathi waaphwanyaney'ahu vale, atthu anci-ene, nkisuwenle akavi akilanthi va vano, yaahikhala muloko n'anli wala muloko n'axexe, muloko n'athanu a hiyo yaakilanthi vale. Naanaanoru, mulaleyi mmosa khukirweela khwira, "Munna Branham," owo khwira, "nsina naka ka *Lexe ni lexe*." Khwira, "Miyo kaari mmosa a alipa-oowookhaliheryani oCalifornia."

¹¹⁰ Miyo khwira, "Kootteliwa murima woosuwelani, mulopwana." Douglas McHughes. Owo khwira, "Miyo ka. . ." Miyo khwira, "Kootteeliwa murima woosuwelani." Khuvahana mukhono ni yoowo.

¹¹¹ Owo khwira, "Ahe, vano, kintthuna kookoheni etthu." Khwira. . . Roy Roberson, atiministratore va; Munna Wood, Terry ni Billy, ni, oh, Munna Mc Anally, ni nkisuwenle yaari ani othene ale yaaphwanyaneya iwe. Nto miyo. . . Owo khwira, "Kintthuna kookoheni etthu emosa." Owo khwira, "Apwiya khula okathi anoovahani soowoona siisa?"

¹¹² Miyo khwira, "Ayo, munna, masi miyo kinoorwa nno wira kirakamele eyo vakhani, wira kimumule."

Nto miyo kiwehaweha *siisa sa*, kimoona tothoro a erutthu omuwehaka, khwira, “Reverendu McHughes, oneeniwa nno mmaithoni mwanyu onimookhalihani oohoona naanaanoru. Miyo kihooloolani miyakha miili, vano nkinwerya wira hat’etthu wa yeeyo.”

Nto miyo khimurukunuwela owo. Miyo khwira, “Ethu ekikohenry’anyu eyo, tothoro anyu aarimooleelani, nihiku nlo, ‘Wira oneeniwa iwo waari mmaithoni mwanyu.’” Waari othana eriyari, voophiyaka ewora ya namuloko ni emosa, vano owo aawanre ilumeta sa nsuwa. Miyo khwira, “Mwaha aya; nyuwo khamunwarela mwaha wa nsuwa, mwaha wa niitho nanyu. Owo oonleleni wira nyuwo ‘naamurowa woopweteyani niitho nlo.’”

Vano owo khupacerya wunla, khwira, “Ti yeeyo.”

113 Miyo kirukunuwa wira keette-tho, kaahikhalana efoxolo mmatatani. Nto miyo kiweha; Kimoona eemenleene vale akiwehaka, maitho awe yaaryaka paahi. Miyo khwira, “Masi SIISO ANIHIMYA T’APWIYA, niitho nlo khaninrowa woopweteyani.” Miyo kaaxaya ni yoowo ephovo ela evinre, owo onniwerya wona sana okivikana miyo ni khula mutthu vamuttitthini. Owo khana . . .

114 Ni kaahimoona muthiyana mmosa mutokweene ookolelaka vathi emeeya awe ni oroiha osulu epante emosa ya esaay’awe. Owo khwira, “Mwan’aka, mwamoonaru Munna Branham, mmuleele wira akivekelele mwaha wa inawo saka.” Nto miyo khuweha vale, nto sikhaani. . . saakhala ntoko mapotthe yaakhuma munawoni mwawe, mapuro othene.

115 Miyo khwira, “Amey’anyu muthiyana mmosa a maihi oottweelela. ‘Mwan’aka,’ moone. Awo ahooleelani muhinatthi okhuma, wira mwakoono vale, mukivekele wira kivekele mwaha wa inawo saya. Awo arina mapotthe makhaani, ntoko, akhumme munawoni mwaya mothene.” Owo aahala ohileya.

Khwira, “Eyo ekeekhaii.”

Miyo khwira, “Mwaaleele wira ehixanke. Sothene sinookhala sana.”

116 Miyo kipacerya weettasa vale. Nto khwiiwa Nsu na Muluku olavula, khwira, “Mukhumase mphironi, mwaakuveke.”

Roy Roberson eemenleene vale, asuwelaka wira owo aari mutokweene ookhottoni, miyo kihela ntata naka mmakhatani mwawe, khwira, “Munna Roy, mwiipithe, vowaakuva ntoko sinwery’anyu!”

Khwira, “Exeni ekhumelenle?”

Miyo khwira, “Mukhume mphironi! Mwiipithe!”

117 Nto kipacerya weettasa vale paahi, kipweha efoxolo aka vathi, kirukunuwa, kirula ekofiyo aka. Vano Owo khirwa, Ovuwa wa Muluku okhuruwaka muyuupuruni waapwenxe epante

emosa ya mwaako siisaale, khirumiha vancipale khuttikinya nipuro nle siisaale, khuthikila iriitta sa miri osulu; voophiyaka inawu tthaaru wala xexe, thanu [0,9, 1,21, ni 1, 52 m] vasulu va muru aka. Khutthika ntoko efunttuli siisaale; Eyo khiruma-tho. Nto, Eyo khirwa, imara tthaaru.

¹¹⁸ Nto okathi Eyo eronw'aya, emara ya neeraru, Munna Banks khirwa, kwira, "Ti yeeyo mwaahimy'anyu?"

Miyo khwira, "Ayo."

Khwira, "Yaari exeni?"

¹¹⁹ Miyo khwira, "Muluku onnoorwa muyuupuruni." Miyo nkaasuwela sinto Owo aathuna wira kaaleele atthu wala nnari.

¹²⁰ Nto miyo kirowa kivekela vakhani. Vano Owo khukileela wira kaaleele. Miyo khwira, "Eyo ehukumu emmana Olimani Onkela nsuwa." Nkawehani-wo olelo! Nkawehani etthu yaakhumelenle vaviraly'aya iwora vakhani numala yeeyo: Alaska khupwina. Nto vano etthu yothene enoopwina. Hiyo ninkela m'ohukhummwani. Atthu aakhoota omoreliwa ikharari.

¹²¹ Masi ni mahala a Muluku, hiyo nookhalana Yolya evithiwe, Yolya ya erooho, tivo onkhal'ahu mwa oreera murima ni ikharari so wiisuupulula wa Yesu Kristu mahiku ala ookiserya, iilipiheryaka Mmansawe eriyari y'atthu Awe. Amen! Awo yaahivolowasa. Eliya aavolonwe eyuumu ehinatthi opacerya. Attotopeliwe Muluku mwaha w'okhala muhina ehukumu ehinatthi orwa. Vano okathi w'okhuma ni ovolowa, okhuma mmitthenkesoni mmo n'uvolowa mwa Kristu, okathi w'okhuma n'uvolowa wa alipa-oowaamini othene eekeekhai.

¹²² Vano owo aahihaniwa, khukhala memme. Muupuwele, owo khaatonko ohiya muratthi ule mpakha Muluku omwiihana.

¹²³ Nto eyuumu ehalelaka omalamala, Owo khumwiihana wira akhume mme, mpakha empa ya muthiyana mmosa naamukhweli. Nwehe, Owo aamwiihanenle wa naamukhweli ula. Ni naamukhweli ula khaaitakanxale n'alipa-oohaamini; waakhela ekhanyeryo ya nxeni okathi wa eyuumu. Vano Owo aamwiihanenle o...aamwiihanne Eliya wira amulyihe naamukhweli ula. Awo yaarinasa mukatthe mmosa mwaamukhaani paahi, etthu emosa yaamukhaani owo aavarelel'awe. Nto Eliya khwira, "Mukivahe yeeyo miyo, toko. Maana, SIISO ANIHIMYA T'APWIYA, mwaapu uwo khonimala-mo nnakhala murinki khonuuma, mpakha nihiku Apwiya Muluku anrow'aya orupiya epula mulaponi." Omuhela Muluku oopacerya, Masu Awe toko!

¹²⁴ Nwehe, waanikhala otthu mmwaaupuni. Khula okathi owo aarowel'awe otthu, waanikhala otthu mmwaaupuni. Yaanikhala makhura mmurinkini, khula okathi owo aarowel'awe. Mwaha wa xeni? Otthu wooniherya Kristu mwa ovahiwa wa otthu.

Maxilo yaahaana okhalihwa sana, wira axile khula emosa. Khula enyeenye ya otthu ula vamosaru voolikana ene, yooniheryaka wira Owo mmosaru nsana, olelo, ni mahiku othene. Awo yaari Masu, Yolya y'Ekumi ettharaka mutthaka, wira elipiherye Masu.

¹²⁵ Ti siiso olelo, apatthani. Ti siiso olelo, wira Yolya y'Ekumi yeeyo aana anly'aya, entthara Mutthaka wa Muluku, wira yaalyiheke okathi wothene wa eyuumu. Ankhi Owo aaphwanyaneya ohoolo wahu olelo? Ankhi Owo aaphwanyaneya ohoolo wahu naanaano va? Owo aamwiira ni opaka vamosaru ntoko Owo iiraly'awe mahiku Owo aary'awe mw'erutthuni mulaponi mu. Mwaakameliwa epantte ya Iya, Ekereja emosaru ti yoolikana ni Kristu. "Miteko Miyo sinvaraaka nyuwo munoovara nave." Nto ti Masu yiirale eyo. Owo oonihimeerya wira itthu Owo iiraawe wira hiyo naamwiira nave.

¹²⁶ Hiyo ninnoona-tho va, vakhala wira Masu ari mwa hiyo ni wira anirwenle hiyo, ntoko Awo saamwiireny'aya Eliya nihiku nle, Awo animwiira etthu emosaru owo iiraly'awe, owo aamulya Itthu soovithiwa sa Muluku seiyo sipithiheriwe olumwenku. Oh! Emara ekina, eyo enniiriha Mutthaka ni namitthaka ntoko mmosaru. Yolya ya erooho ti yoolikana, ni Eyo eri okathi aya vano. Ni khula mmosa a nyuwo onoowerya okhalana Yolya ela mwaatthunaka vale Yeeyo, mwaatthunaka vale otthyawa ohaamini wothene w'okathi ula, mwakhala oolikana wira murwe mwa Kristu, okela muhina mwa natiri Awe.

Ni nwuupuwele anatiri Awe, mwa Malakhiya 4, Luka 17:30, nave mwa Yohani Oowaarya 14:12, ni Soolempwa kavi sikina, s'ohimya, Yoweli 2:38, ni sothene Owo aarow'awe wira, ahiso, kiireke 2:28, etthu Owo aarow'awe wira mahiku ala ookiserya. Ni moota profeta aahimmy'awe wira waamukhala Waarya mahiku ala ookiserya, moota Eyo yaarow'aya ovara muteko, etthu Eyo yaarow'aya wira, Soolempwa sothene sithoonyaka mahiku ala ookiserya. Vano eyo ti Kristu! Mwaaweryaka vale wiipitha mwa Yeeyo vano, Nipuro nlo na siiri, munoowerya olya ni woona oreera murima ni omoriwa ikharari wa Muluku. Mwaari mureta, wookhala ovonihwa mmo.

¹²⁷ Nyuwo munnuupuwela okathi Eliseyo, ohoolo waya, aahiruma okhuruwa... Numala ovahiwa w'otthu ule owo aarinaawe, Kristu, ni khulyiha etthoko ya naamukhweli ni Yoowo. Nwehe ohoolo waya okathi owo iihanne awe mooro okhuma wirimu, ni sikina, ni khooniherya orummwa wawe, wa Muluku, Eroho ya profeta.

¹²⁸ Nwehe mothakoni, okathi owo aakilanthi awe vathi vale va mwiri juniper, Nlaikha nimosa naakhurunwe ni enamuna yeele y'otthu, khooxa mikatthe khimulyiha. Nto okathi vakhani ohoolo waya owo khimuhiya-tho arupaka, vano khimuvenga, vano owo aahikhalana mikatthe mikina sooxiwe iwe sa yoowo.

Vano owo aaheetta ni ikuru sa mikatthe seiyo mahiku miloko mixexe. Avuwihwiwe Muluku! Owo mmosaru nsana, olelo, ni mahiku othene. Oh, moota hiyo onimphent'ahu Owo, Yolya ya erooho m'okathi Aya!

¹²⁹ “Khivanreerela okuxa yolya y'anamwane ni waavaha alapwa.” Yesu khamuhimeenrye etthu emosaru muthiyana a oSiro-Feniisiya? Owo aarummwe w'Awawe. Ti yeeyo. Ni ti yaawo Owo aarweenly'awe. . . Owo khanaroweke w'Amalapo.

¹³⁰ Nto vano olelo Owo onaathotola Amalapo okathi aya, ni khivanreerela. . .

¹³¹ Nyuwo muniira, “Mwaha wa xeni Mutthaka ohikhumaka orowaka mapuro ala maalupale, mikumano iya suulupale, ntoko eriyari ya miromolelo?”

¹³² Kihiyi Yolya aya. Kahi Yolya, ya ekereja, ele eniisiihana siiso. Eyo Yolya ya Mwaakameliwa. Eyo Yolya ya erooho mwa okathi. Eyo yaamurowa owiitta mmirimani mwaya. Eyo ti yoowaalemela awo. Munnona? Munnona? Nyuwo—nyuwo—nyuwo muhiireke siiso. Masi, wa aana, Eyo Yolyaa, Eyo Ekumii, Eyo ti Yesu Kristu mmosaru nsana, olelo, ni mahiku othene.

¹³³ Nnoolekela vanci-ene naahipacerye-ru eliinya ya mavekelo vano, tivo ninrow'ahu wuuramiha miru okathi vakhani.

¹³⁴ Muluku Ootthuneya, Yolya m'okathi aya, Yolya ya erooho. Etthu emosa olumwenku ohinsuwel'aya hat'etthu ya yeeyo. Moota owiiwaly'ahu Apwiya ahu ohimya ohiyu ule, ahiso nihiku nle oSamariya wu, nipuro nimosaru nenlo Eliseyo eentty'awe khwira, “Vano, okame khummora mpakha miyo kiihane.” Moone Yesu aaphwanyaneya vaavale aahimeeryaka awiixutti Awe.

Khwira, “Mwiixuttihi, muhinlyelani?”

Owo khwira, “Miyo kookhalana Yolya nyuwo ehinsuwel'anyu.”

¹³⁵ Vekeekhai, Pwiya, Yolya Awe waari wira otthuna wa Muluku, wona miteko sa Muluku wooniheriwa okathi Awe. Owo aari vale wira oonaxaxeke wira saaniiriwa. “Miyo nkiniira hat'etthu ehikhanle wira Atithi Aka anookooniha toko. Ele Atithi anikoonih'aya, Miyo kinniira.”

¹³⁶ Nto, Tithi, ti siiso olelo. Ekereja, mulipa-oowaamini eekeekhai, Erutthu y'alipa-oowaamini, enniphiyerya Yolya, Yolya ya erooho, ele alipa-oowiihimya ahinsuwel'aya hat'etthu ya yeeyo. Olumwenku khonsuwela hat'etthu ya Yolya ela, Tithi. Masi Ekereja Anyu, atthu Anyu, Mwaakameliwa a Mwan'Inyu, onniphenta Eyo.

¹³⁷ Hiyo ninniphiyerya ovonihiwa wa irutthu sahu okathi matothoro avonnye aya. Hiyo ninniphiyerya ela. Eyo ti emosa wa Solya sa Muluku, Owo ovanhe awe Ekereja Awe, ni ohaaliherya eyo mahiku ookiserya an'Awe anaamini. Tithi, munikhaliherye wira nikhale aana anaamini, maana itthu

sothene sinniweryaneya w'ale anaamini. Munivahe, Muluku Ootthuneya. Hiyo ninvekela mwa Nsina na Yesu. Amen.

¹³⁸ Miyo kookupali wira Billy ookileela wira ookawa ittikitti kamosa kamosa sa mavekelo. Akhala mutthu onwerya okileela eletera eri vattikittini ya mavekelo, eyo ti yothene entthun'aka. [Mutthu mmosa oniira, "C."—Mol.] C, vaareera, nrowe nikuxe C, emosa, nipacerye, mpakha miyo kipacerye eliinya ahu. Moone, vano, siiso akhanleene mapuro othene. Vano, vakhala wira atthu othene. . . Ahe, moone, kinrowa wehererya ela. Miyo nkisuwenle sinto vannitthuneya hiyo wira wala nari. Wala nithateke eliinya emosa paahi w'ale aniihaniwa; nyuwo mukilaathi mmaale. Khenvirikana wa miyo. Mwaatthunaka orwa va vaplataforma, wala okhalana eliinya w'ale aniihaniwa, khenvirikana, enamuna emosa wala ekina. Miyo kinlipa paahi ni Eroho Yowarya. Miyo kinlipa ni Yoowo wira aakiherye Masu ala miyo kilalenry'aka.

¹³⁹ Munna George Wright, miyo kinaamini Iyo. Okhuma kiri-ene mwanamwane, kirwaaka owannyinyu miyakha sinci-ene sivinre, omwiiwa maarwe okotenleene mmwirini, miyo nlelo kinaamini Mutthaka yoole. Miyo kinnaamini wira Mmosaru Yoowo.

¹⁴⁰ Vaareera, miyo kinnoona wira awo antthukula opuro wira ekhale eliinya ya mavekelo. Vaareera, ettikitti ya mavekelo C, nummuro nimosa, manli, mararu, maxexe, mathanu, epacerye orwa yeemele vaava va. Mwaahiweryeke ovenya, mwavenxa-ru matata anyu paahi, atthu akina a awo animookuxani. [Mutthu mmosa onlavula ni Munna Branham—Mol.] Exeni iyo? Ayo. Uh-huh. Ettikitti ya mavekelo C, emosa, piili, tthaaru, xexe, thanu. Nto vano nwehe, nyuwo muhirina etilikiti ya mavekelo. . .

¹⁴¹ Vano, miyo nkinkhalana eliinya ya mavekelo ntoko ela okhuma khalayi, khalayixa. Akavi anuupuwela muteko aka okathi otenk'ahu etapernakulu va? Iirale, "Nvare muteko wa namalaleya." Khiirale wira kaari namalaleya. Iirale, "Nvare muteko wa namalaleya," moone, "maana onimoorwa okathi eyo enrow'aya orukunxiwa." Okathi uwo onoophiya. Vaareera. Vano, mwa yeela, Owo. . .

¹⁴² Khivanweryaneya otakanxa miteko miili wala miraru vamosa, pastor ni olaleya, okathi mmosaru. Khivanweryaneya nyuwo okhala pro—profeta ni khino pastore, okathi mmosaru, moone, 'okhala wira nyuwo murina miteko soovirikana, muteko woovirikana.

¹⁴³ Masi Apwiya akivanhe ele yaatthuneya wira kiire Mmutthakani mwaka. Masi vano Awo khwira, "Nvare muteko wa namalaleya, nvare muteko anyu sana, maana onimoorwa okathi awo ahinrow'aya otthuna wiiwa Mwiiixuttiho wooreera." Moota ophin'ye aya vano! Khula ekereja ya muromolelo yaarookikhootta. Awo khayaatthuna wiiwa Mwiiixuttiho wooreera. "Masi eneeniwaka owaruni awo animwaakeliha

awiixuttihni aya, ethhikelaka ihanstisi. Nto awo anoopaka itthu suulupale sa miteko soovuwa ntoko Yampere ni Yane yaamuvannye aya Moise, masi ololo aya onoosuweliwa.” Munnona? Munnona? Vaareera, mitakiheryo! Nyuwo munnona moota Yampere . . .

¹⁴⁴ Ni, Muluku Wirimu onnisuwela, wira eyo emphwanyaneya vaavale vale vanlukuni n’olipiha- . . . (na etapernakulu ele) . . . -okhuma 1933, yolempwa vanikukhuni na Bibilia, nipwehiwe vaavale vale. Nkawehani moota awo yiirinhe aya. Nkawehani etthu yiiraneiyi. Mitakiheryo, vekeekhai. Khwira, “Mwaahiye, ololo aya onoosuwelihiwa siisaale ntoko wa Yampere ni Yane waasuvelihiw’aya.” Hiyo nri va nihiku nenlo.

¹⁴⁵ Miyo kaahoonna ekereja nto okathi naathipel’ahu nluku n’olipiha, atthu yuuramme-ene mukhitte mwa canela ni mapuro othene, yeemenleene muxirini mwa etapernakulu. Eyo eri vo. Awo khwira, okathi yeemexiw’aya, atthu a mmuuttettheni mu, khwira, “Muhina wa miyeeri mithanu na mosa . . .” Hiyo ni etoolare emosa ni isentavo miloko mithanu na miraru wira niteke etapernakulu, atthu anci-ene a mukaraaxe khulakela wira yaarowa okhala ekaraaxe aya. Masi nlelo nikhoma na ipwittipwitthi na Ipwittipwitthi sa Muluku.

¹⁴⁶ Emosa, piili, tthaaru, thanu, thanu na mosa, thanu na piili, thanu na tthaaru, thanu na xexe, muloko. C, thanu na mosa, thanu na piili, thanu na tthaaru, thanu na xexe, muloko. Vaareera.

¹⁴⁷ Vano, “Miyo Apwiya kihaala, Miyo kinoonaaniha othana n’uhiyu wira ohikhale onikumihha mmatatani Mwaka.” Nkawehani wuulumela! Hata muromolelo wo okhaliherya Yeela. Khiyaavo hata ekereja ntoko Yeela mmuttettheni mu. Hata emosa ya Pentekosite mulaponi, hat’etthu ekina wira ekhaliherye Yeela. Atthu othene oohitthuna opatiiso mmaasini, atthu othene oohitthuna itthu sothene iya sikina. Hata amusi aka yoomi, atithi aka yaahikihela ota wa mukhora, miyo kihela ikuwo saka mmurupani wa epaphelo khurowa okhala oNew Albany. Ekeekhai.

Masi muhina mwa ihasara sinci-ene, miteko ni
matapha,
Miyo koovira;
Ti mahala akirunhe oolipa mpakha va,

Kirina miyakha miloko mithanu ni mithanu na mosa, nto naanaano kihaana olapuwa muro.

Mahala anookiroiha ohoolo.
Kamalaru okhala iwe miyakha ikonto muloko,
Oowooneya ni oowaarya ntoko nsuwa;
Khaninrowa okhalana mahiku vakhani
oomwiipela isipo Muluku
Ovikana okathi opacenry’ahu.

Oh, moota onimphentaaka Yesu! Owo t'okhanle muulupalexa wa miyo!

¹⁴⁸ Oh, vaareera, akavi miyo...Keemenle vaavi, muloko? Niihaneke sikina? Vaareera. Yaari akavi, muloko, muloko ni thanu? Vaareera. C, muloko mpakha muloko ni thanu, vatthu ti vatthu mury'anyu, mwawerya-ru ovenya n'urwa. Mwinre sai? Hah? Vaareera. C, muloko ni thanu mpakha miloko miili, nto. Ekhale C, muloko ni thanu mpakha miloko miili. Anookhala atthu muloko tho. Hiyo ninnoona...Nkoonani—nkoonani vatthu vamphwanyaneya eliinya vale, nihaahiye—nihaahiye okuttelana. Nto hiyo... Vaareera.

¹⁴⁹ Vano mukivahe owiriyana wanyu wothene; khaninrowa opisa. Masi, vano, oh, ewora xeni, okathi xeni! Miyo—miyo kaatthuna wira atthu othene yaaphenteke Apwiya. Miyo—miyo kaatthuna wira hiyo othene niphiiyeriye nipuro nle no osuwela owerya wa minutu ula. Nrowe neererye. Mukivahe owiriyana wanyu paahi.

¹⁵⁰ Exeni—exeni hiyo enerery'ahu wira va? Hiyo ninootola Masu a Muluku. Eliya aahira etthu yeeyo, owo aaheetta mpakha omwaako numala osuwela wira aarummwe okhuma wa Muluku wira iire. Owo khwira, “Vano nrowe nimooniherye ole okhanle Muluku, Muluku onaakhula ni mooro okhale Muluku.”

¹⁵¹ Nto apakawu yaamwiithikilasa, oh, yiira, “Ahe, vekeekhai, nnari...” Apakawu yaanisuwela wira mooro khiwaarowa omora, tivo awo yaakhuwel'aya ni wira ithiru.

¹⁵² Masi Eliya aanisuwela wira waamurowa omora, 'okhala wira owo aahikhalana yowoona yaakhumme w'Apwiya.

Nyuwo muniira, “Owo aahikhalana yowoona?”

¹⁵³ Ayo, mulopwana! Okathi waatthokinhe awe sothene, owo iirale, “Pwiya, miyo kiihira sothene iya ntoko oruma Wanyu.” Vano nto mooro khupacerya omora. Masu a Muluku yaatthariwaka ntoko silempw'aya, nto ti ya Muluku okhapelela sothene. Owo onoovekelani paahi opweha vale. Ni mukupali wira nyuwo muniihaneliwa wira mpwehe vale. Munnona? Nto nyuwo mwaari owiihaniwa, Owo onookhapelela ele enihala.

¹⁵⁴ Vano, va anookhala atthu eviraka eliinya ela kinrow'aka waavekelela...Vano, ahe, nyuwo mwaattamenle exiri vano, vaareera, wira eliinya epacerye. Vano, toko, mano nipuro nimosa mu mpaani, atthu kamosa kamosa... .

Akavi mu anwereiwa ni ahirina ettikitti ya mavekelo, nvenxe ntata nanyu. Moone, mapuro othene. Vano, nyuwo moosuwela vakhala wira Pwiya'ahu...Ni miyo kookupali wira Owo onimwiira, Owo aari-ene mmosaru nsana, olelo, ni mahiku othene. Owo aaneettiherya iliinya sa mavekelo. Atthu yaanirwa wa Yoowo mwa iliinya suulupale, mittitthi s'atthu, Owo aanaakwannya, waareerihya. Vano Owo khweemela

emara eyo khwira, “T’ani okikwanyale?” Khuwehaweha, khimuleela muthiyana mmosa etthu aamukwanyenly’awe Owo; nto khwira wira ovuuva wawe ephome waahimala, waamini wawe waahinvoniha.

155 Ankhi owo aarukununwe khwira, “Ahe, miyo nkisuwente, Pwiya, woovira okathi munci-ene kirineene ela”? Khiyaarowa wiiraneya. Nnari, khiyaarowa wiiraneya. Nnari.

156 Ankhi Owo aamuhimenrye muthiyana a oSiro-Feniisiya, “Mwaha wa nuulumo nla muhimmy’anyu, mwan’inyu, xetwani oomuhiya,” ankhi iirale, “Ahe, vano, Pwiya, miyo—miyo kaatthuna wira Nyuwo mwiire enamuna *ela*”? Xe—xetwani nlelo aamukhala mwa mwali ule. Masi owo aahiroromela omuphwanya mwan’awe ntoko Owo saahimmy’awe wira aamurowa omuphwanya.

157 Vano, Owo oonihimeerya, “Mwaaweryaka waamini! Mwiirela mwaako ola, ‘Othaame vo,’ muhihoveryaka mmurimani mwanyu, masi mwaaminiki wira ehimmy’anyu enimwiiraneya, munimwaakhela. Mwaalompaka, mwaaminiki wira munimwaakhela, munoovahiwa.” Natiri xeni!

158 Vano mutthu onlaleerya ehapari yooreera y’opatthani khonaamini iyo nnakhala. Owo aamweetta mpakha vamukhora, awehe mapaani, wala weemela vale, ni wira, “Ahe, nikhuru nikina n’amasantu oophirikeya,” aroweke. Munnona? Masi owo khonsuwela wira eyo Yolyaa yo wiipithihiwa. Owo khonsuwela wira ela Etthu ya siiri owo iipithiheriw’awe. Owo khonsuwela eyo. Eyo ti—eyo ti—yookhupanyereya, muupuwelo ohiwanr’etthu, oothoiwa, oohoona, nave khonsuwela. Munnona? Eyo etthu yootakhala.

159 O Muluku, mukihye kikhwe toko, masi muhikikhalihe siiso. Miyo kaamuthanla okhwa (ayo, mulopwana) ohikhanle wira siiso. Miyo kinoona wira khula mmosa a hiyo naamutthuna, khanaarowa? [Muthukumano onira, “Amen.”—Mol.]

160 Masi, vano, Muluku oonilaiherya itthu iya mahiku ookiserya. Mwa Malakhiya 4, ohimmye wira Yesu Kristu aamukhuruwa ni wiisoniherya mw’erutthu ya mutthu ntoko Owo siiralyaawe oSotoma. Ti yeeyo. Ni ohimmye wira olumwenku waamukhala mwa mukhalelo w’oSotoma. Ni ohimmye wira, “Ntoko saary’aya okathi ule, Mwana a mutthu aamwiisoniherya nihiku nlo.” Moone, Mulopwan’ola aakhurunwe ntoko mutthu, yoowo aari “Elohim,” mwa Abrahamu, mwaana a natiri ohinatthi orwa. Nkawehani yaari exeni, Abrahamu ohimmye wira aari Muluku. Ni Bibilia ohimmye wira yaari axilopwana araru yaamurwenle, ntthupi mukuwoni mwaya, na mukwaha, khukilaathi khulya ntoko atthu. Nto Yesu ohimmye wira, “Okathi ene yoowo olumwenku onkel’aya mukhalelo w’oSotoma, nto Mwana a mutthu aamwiisoniherya-tho Mmansawe.” Kahi Mwana

a Muluku, Mwana a mutthu, moone, aamwiisoniherya Mmansawe.

¹⁶¹ Vano mulepe eyo n'ile profeta ookiserya ehimmy'awe, "Moone, Miyo kinoomuruma profeta Eliya, nto owo onoohokoloxerya mi—mirima s'aana w'axitiithi aya." Munnona? Mutthaka mmosa wira waahokoloxerye mBibiliani, nto Mwana a mutthu onookhala iisooniheryaka Mmansawe nihiku nlo. Ni nihiku nlo oruma wa okathi wookiserya w'ekereja, nlaikha na neethanu nenli, isiiri sa Muluku saamusuwelihiwa nihiku nene nenlo. Ikanyeryo Thanu na piili saamutaphuliwa. Isiiri sa ikereja iya sothene ni itthu siiso, moota sikhumelenly'aya, ni yiira- . . . moota, etthu yiiraneiey.

¹⁶² Moone, awo khansuwela Eyo. Yesu ohimmye wira, "Nyuwo aFarisi ohoona!" Khwira, "Mulipa-ohoona amweettihaka mulipa-ohoona, owanli aya khammorela mulittini?" Moone, tivo atthu awo ahinoonaaya Eyo.

¹⁶³ Esiiri Aya, ti, Ikanyeryo iyo, khula emosa wa ikereja iyo eroopaka mutthenkeso khukela memmo, vano eyo ti emosa wa itthu sa siiri saari sootakhala vamaithoni va Muluku. Nyuwo munnoona, Totori Lee? Moone, nkawehani. Ti yeeyo. Eyo ti etthu ene vo. Eyo ti emosa wa isiiri. Awo arimwiitthokihi ni, moone, ni yaari mohitthuna wa Muluku voomalela. Ni eyo enimooniheriwa mahiku ookiserya, ni enooweettiherya atthu, kahi muhina wa eyaaminelo wala muromolelo, masi ohokolowela Masu eekeekhai. Ni Masu eekeekhai animwaarweela nikhuru nimos a n'atthu, ni Mwana a mutthu onimwiisooniherya Mmansawe eriyari aya, "mmosaru nsana, olelo, ni mahiku othene."

¹⁶⁴ Oh, wulu! Oh, miyo okisivela yeeyo. Miyo okisivela—okisivela wiihimya ni Yoowo. Miyo okisivela o—omukhaliha Owo muulupale ohoolo w'atthu. Nkirina y'omukhaliha muulupale; Owo muulupale tu. Owo t'orakama vahinweryaney'aya ovira vasulu Vawe, oowiixa vahinweryaney'aya ovira vathi Vawe, ootaphuwa vahinweryaney'aya omurukurerya, nave nnakhala vo nyuwo mookhalana opuro mmurimani mwanyu wa Yoowo. Khamunimwaakhela Yoowo? Moota Pwiy'ahu ory'awe ooreerexa! Vaareera.

¹⁶⁵ Vano nrowe nikhale oomaala sana, atthu othene. Vano, hiyo noolavula Ela. Nto vano etthu aya ela ti, Ela ekeekhaii? Vano, siiso akhanleene aletto mu. Miyo kaamuhimya wira vaari wira . . . wa nyuwo, vakhala wira Kristu mmosaru nsana, olelo, ni mahiku othene, exeni Owo aarowaawe wira minutu yoola? Owo aamwiira etthu emosaru yeeyo Owo iiraly'awe okathi waary'awe na khalayi. Eyo ekeekhaii? Waamini w'atthu waamukwannya nlaya Nawe, vano Owo aamurukunuwa. Ntoko Owo saamwiirenly'awe muthiyana vehimeni, ni siiralyaawe mapuro makina, ni aasuwenly'awe miyuupuwelo saya.

Vano, nyuwo muniira, "Owo aamuwerya okivoniha?"

166 Masu Awe ahimnye wira Owo ohiira yeeyo. Masi etthu aya t'ila, wiisuweliha wira Owo ori vaava.

167 Vano, vaakhanle wira Owo oonirweela mw'erutthu, vekeekhai ntoko *Muru wa Kristu ni miyakha Miloko miraru ni miraru*, wa Hofmann ni ephome evuuvaka mmatatani Mwawe, ni sikina, marapala a ipereku mwa Yoowo othene, miyo nkaarowa okupali. Nnari, nnari. Nnari, nnari. Okathi Owo onrw'awe, Mwaneene, "Maitho othene anoomoona, malumi othene anoomuhimya Yoowo; ni ntoko overunya onkhum'aya Onikhuma nsuwa mpakha Onikela nsuwa, siiso enookhala." Munnona? Hiyo khinnaamini itiini iya ni mahimo. Hiyo ninaamini wira Muluku ti Masu.

168 Masi Owo onihela mw'erutthuni Mmansawe, okuxaka erutthu anyu ni erutthu aka, ni woovahani soovaha, n'ukivaha soovaha, ni mwa soovaha seiya Owo onimwiisuweliha Mmansawe. Eyo ti Yolya ya siiri. Hata wira Owo aamwiisuweliha moota xeni mwa miyo, nyuwo muhaana waamini Iyo, nyuwo muhaana okhalana yoovaha ya waamini, nave, wira mwaamini Iyo. Nyuwo munaamini? [Muthukumano onira, "Amen."—Mol.] Nto vano Owo iisoonihery'aru Mmansawe mwa enamuna yeeyo, nyuwo munoomwaamini Owo? [Amen.] Ni murim'anyu wothene, munoomwaamini? Oh, ti yooreera, nimuwehereryaka Yoowo paahi, niwehereryaka paahi wira noone etthu Owo onihimy'awe.

169 Va oniphwanyaneya mulopwana eemenle va. Miyo nkinamooneke makhalelo aka, ntoko sinsuwel'aka. Onikhala ntoko mulopwana, oreera murima a ikuru, mukumi, ni khino owo siryaawe, miyo—miyo—miyo nkisuwenle. Masi owo eemenle vale. Vano, miyo kaamuwerya orowa omwiixathera matata mulopwan'ole ni omuvekelela, ni omukoha sinto aamwaamini. Owo aamuwerya okhala va ni okileela, wira, "Miyo—miyo—miyo kintthuna mmuvekelele *Lexe ni lexe*. Ni miyo kirina—kirina inawo sookhoropana. Miyo kinwereiwa muru, voohihyererya. Miyo kirina nalipwi munipwiipwini," wala etthu siiso. Owo—owo, miyo nkisuwenle. Owo aamuwerya ohimya etthu p'itthu wa seiyo.

170 Miyo kaamwiira, "Vaareera, mulopwana, munna. Miyo kinoowixaatheryani matata aka ni koovekeleleni." Eyo yaamukhala yoolikana sana. Vekeekhai ti yeeyo hiyo eniiraahu movirani w'okathi. Eyo ekeekhai?

171 Masi, muupuwele, Yesu ohimnye wira yaamukhala yoovirikana okathi yoowo w'Orwa Wawe, ntoko saary'aya mahiku a oSotoma. Nto Mulopwana aarwiiye, ettuli Awe aarenrye eheema memmo Sara aary'awe-mo, vano Owo khwira, (kahi "Abramu," vano) "Abrahamu."

172 Moone, owo aari Abram, nsana naya. Masi owo aahiphwanya yoowoona, vano Apwiya khimuleela wira, "Miyo kinrowa orukunxa nsina nanyu."

173 Vano va ari Apwiya, Aneene, ntoko mutthu, elyaaka ni ewuryaka ni yoowo. Khwira, "Abrahamu, amwaar'inyu ari vai, Sara?" S-a- . . . r-a; kahi S-a-r-a-i.

Owo khwira, "Awo ari muheemani, ottuli Wanyu."

174 Khwira, "Miyo kinimootholani, kimuttharihaka natiri Aka miyakha miloko miili ni mithanu sivinre."

175 Nto Sara khutheya vakhani meekh'awe. Owo khwira, "Sara aahitheya muheemani okathi ene yoowo, iiraka, 'Sinweryaneya sai okhala itthu iya?'" Uh-uh. "Yookhala etthu yoomurikela Muluku?" Munnona? Hat'etthu. Nnari, mulopwana.

176 Vano Owo ohimye wira, Yesu oohimya wira, "Owo, Mwana a mutthu," yoowo okhanle Masu, (nyuwo munnaamini yeeyo?) "aamorwa mahiku ookiserya ni aamwiisooniherya Mmansawe okathi olumwenku waarow'aya okhala ntoko Sotoma ni Komora." Nyuwo munnamini wira eyo ekeekhaii?

177 Nihinatthi okhalana nivekelo nimosa, amosa amosa a nyuwo iwo nvekele nto moone sinto Mwana a mutthu nlelo mmosaru nsana, olelo, ni mahiku othene. Mmukohe paahi aari Yoowo, mwiire, "Pwiya, mulopwan'ole khonkisuwela, masi miyo koosuwela wira Nyuwo mwa mmosaru yole a nsana, olelo, ni mahiku othene," moone sinto Owo onnooleelani yeeyo.

Ayo, mulopwana. Vano nvenxe muru anyu okathi vakhani.

178 Ori ottuli waka. Owo mwaanaa. Owo onopaheya naanaano va mwaha w'ehooma. Owo mwanamwane mwamuthiyana. Nyuwo munikhuma ota wa muttethe. Mwaan'owo ommuwereya mmirimani. Waaninwereya. Mwaamini paahi.

179 Vano, ti yeeyo Owo aahimyy'awe wira aamwiira? Miyo nkinamooneke mutthu uwo makhalelo aka. Muluku Wirimu onnisuwela eyo.

180 Mulopwan'ola va, onikhala ntoko a ikuru ni mukumi. Masi munnoonna eruku ile vasulu vawe vale? Eyo enihimya wira, woohikhala wira Muluku onoomukhaliherya, owo khonrowa okhala va okathi munci-ene. Owo orina kankuru. Ori mmasasuni mwanyu.

Vano, Mwana a mutthu ori vaava.

Owo ookhalana muritti vamurimani vawe mwaha wa mwammiravo mmosa, mwanamwane. Eyo ekeekhaii? Nyuwo munnaamini wira Muluku onniwerya okileela etthu evonyeiyeni ni mwaan'owo? [Munna owo onira, "Miyo koosuwela wira Owo onniwerya."—Mol.] Owo onniwerya. Owo onophiyeryaka ohileya vakhani ntoko icile. Owo aahikhalana emosa naanaano. ["Voosiis'ula."] Ti yeeyo, voosiis'ula. Nto nyuwo munnaamini

wira munookhala wira mmulele mwanamwan'owo, ni wira owo onookhala mukumi? ["Ayo."]

¹⁸¹ Ori vai Charlie Cox? Ori vai? Charlie, muri vai? Miyo koona wira owo ori vaava ohiy'ula. Va, Charlie. Gary, muri vai? Larry, owo ori vaava? Mwammiravo awe aarina etthu emosaru, vekeekhai etthu emosaru. Muri vai, Larry? Murwe nno minutu mmosa. Ahe, ola ori va. Mwammirav'ola va aarina etthu emosaru. Atithi awe n'amey'awe axipatthani aka ooreera murima. Miyakha sivinre miyo kaari wu, nto mwammirav'ola aanikhalana ehooma, aanisirikha n'uhileya. Saari icile. Miyo kaahoono eyo mwa mwammiravo owo, khunvekela Muluku wira anvonihe. Owo khanakhalaneke-tho hata emosa okhuma vaavo. Awo t'atithi awe; amey'awe akilanthi vaava nipuro nlo; vano ola ori va mwammiravo ene, mmansawe.

¹⁸² Vano nyuwo munnaamini, mulopwana? (Kooxukhuru, Larry.) Nyuwo munnaamini, mulopwana? Muluku a Wirimu oovaheni etthu yeeyo nyuwo, ni nyuwo mukhale wira mmulele mwaan'owo. Muluku ooreeriheni.

Nivekele.

¹⁸³ Muluku Ootthuneya, mmukhaliherye. Miyo kinvekela wira ikharari Sanyu ni mahala sikhale mwa yoowo ni mmureerihe. Mwa Nsina na Yesu.

¹⁸⁴ Mutthikeleke oLouisiana vano, otthapa, mmuttotopele Muluku mwaha wa yoowo.

¹⁸⁵ Oh, ayo, owo aari a oLouisiana, vekeekhai aari a weiwo, waattamela Ntthiya Charles. Ekeekhai. Moone, miyo kinoowerya ovara miyuupuwelo sanyu vano. Attotopeliwe Muluku!

¹⁸⁶ Ahe, nyuwo munvekela e—etthu yooreera, munthuna okhalana mwaana. Nyuwo mootoko okhalana aana, aana anli, masi mummuthuna mukina. Muluku a Wirimu oovaheni, murokor'aka. Rwani nno, miyo kintthuna kiwiixaatheryeni matata.

¹⁸⁷ Muluku Ootthuneya, mmuvahe muthiyan'ola entthuna murim'awe, okhala wira niwoko noophwanela. Mwa Nsina na Yesu. Amen.

Vano rowani mwakhalane mwaana.

¹⁸⁸ Muluku ti Muluku ooreera murima. Nyuwo munnaamini yeeyo? [Muthukumano onira, "Amen."—Mol.] Owo onnisuwela sothene simphavel'ahu. Owo onnivaha sothene simphavel'ahu hiyo naaminikiru. Owo ohimye wira, "Mwaaweryaka waamini!"

¹⁸⁹ Miyo kihoovahani mukhono nipuro nlo. Nkinuupuwela waari vai, masi nipuro nlo miyo kihoovahani mukhono. Nkinuupuwela sana, masi hiyo naahikhala nipuro nlo, olelo nipuro nlo, masi nkisuwenle waari vai. Masi eyo kahi vatthu,

etthu ekhalenly'ahu va wira nilavule. Nyuwo muri va wira mulavule mwaha, ahiso ovekela, muntthuna wira kinvekelele mutthu mukina. Ti yeeyo. Owo khokhanle vaava. Owo ori oGeorgia, muretta. Kahi muretta paahi, w'erutthu, masi muroohoni owo muretta; munn'inyu. Nyuwo munnaamini wira Muluku onookhapelela ela mwaha wo wira nyuwo moomweemererya? Munnaamini? Rwani nno nivekele hothe.

¹⁹⁰ Muluku Ootthuneya, mmuvahe mulopwan'ola entthuna murim'awe, wira owo arowe amphwanye mulopwan'ola amunlelaka Muluku. Mwa Nsina na Yesu kinnivekela. Amen.

Muluku ooreeriheni. Muhihoverye. Mwaamini ni murim'anyu wothene.

¹⁹¹ Ehali anyu? Kahi wira miyo nkookonle ntata wira kookhomaseni nto, okathi mwaakookolenly'anyu ntata, yookhala koonaka. Yaari eruku, yooriipela sana ni y'epiphi. Mwaha wa yeeyo. Miyo koosuwela wira kaavanre-ru ntata nanyu, kaamuphwanya siiso, moone. Masi owo kankuru. Munnaamini wira Muluku onniwerya omukumiha? Ori vatthirima vanyu, moonoo woothiyana. Muntthuna otthikela oCarolina ni waattotopela Apwiya mwaha wo ovona, khamuntthuna? Munnoona enihimy'aka? Nivekele.

¹⁹² Muluku Ootthuneya, mwa Nsina na Yesu Kristu, Yoowo ori vaava naanano; aana ely'aka Yolya ya Muluku, mwaan'ola nave atthapele waamini, Yolya ya Muluku Owo oninvah'awe vano wira aakhele ovonihwiwa wawe. Wira owo arowe ni akhale mukumi, mwa Nsina na Yesu. Amen.

Muluku ooreeriheni, munna. Mwaamini ni murim'anyu wothene.

Ehali anyu?

¹⁹³ Ola kahi okathi wooreerexa? Enikhala paahi wira woova onimwaaphwanya atthu. Ahiso, khino enikhala ntoko, mmaaruni mwaka, ntoko paahi etthu erowaka, "Whew!" Enyakulaka paahi, ntoko, "Whew," siiso, moone. Eyo Yolya y'ana. Munnona? Ti yawinyu. Ti ya nyuwo. Kahi yawaka; Ti yawinyu. Miyo kooxukhuru vanci-ene, okathi yoola vano, miyo nki. . . Miyo kiri sana, ntoko sinsuwel'aka; masi Eyo Yolya aka, nave, okathi onttunaaka. Eyo Yolya anyu. Iwo olipiherya. Wa nyuwo hata muhinwereiwa, vekeekhai enniruuha mirima sahu ohoolo wa Muluku.

¹⁹⁴ Eyo vekeekhai eri m'okathi, yeeyo Owo aahimmy'awe wira aamwiira, "Nto ntoko saary'aya mahiku a oSotoma, siiso enookhala orwa wa Mwana a mutthu, okathi Mwana a mutthu onrow'awe wooniheriwa." Munnona? "Nto, moone, Miyo kinimoorumihelani profeta Eliya nihinatthi ophiya nihiku nuulupale ni noowoopiha n'Apwiya. Owo onookhokoloxerya mirima s'atthu w'Axitithi aya." Munnona? Munnona?

¹⁹⁵ “Nto vo anaxariya animweetta vasulu va—v’alipa-ootakhala, ittuurwa.” Awo anoopaheya ntoko ttukuttha, moone, elapo enoopaheya. Hiyo ninnoona wira enoorowa omorela wu. Nto miyaako sa mooro sinoomwareela mapuro othene mulaponi, ni erimu enoopaheya.

O Mwala w’Okathi, mukimorele ikharari vano, ni okathi yoowo.

¹⁹⁶ Ehali anyu? Ahe, etthu emosa, nyuwo murina muxankiho w’athiyana, muxankiho w’athiyana. Mookhalana itthu sikina. Nyuwo munoottettemera, vekeekhai iwo ti wunnuwa w’okhala n’ettettemeri. Mikattyamiho sa khula enamuna. Masi yookhala entthun’anyu, nave, eri waakhela Eroho Yowarya. Yeeyo pahi. Ti yeeyo. Munnaamini wira nyuwo mwa... Nyuwo moolapa sothene? Munnaamini wira kawixatheryani matata khunvekela Muluku wira aire, Eroho Yowarya enimoorwa? [Munna owo oniira, “Ayo.”—Mol.] Munnaamini yeeyo? [“Ayo, mulopwana.”] Nivekele.

¹⁹⁷ Muluku Ootthuneya, miyo kinimwiixaatherya matata aka muthiyan’ola, mwa enamuna y’arummwa, ni kinvekela wira aakhele opatiiso wa Eroho Yowarya. Mwa Nsina na Yesu Kristu, owo aakhele Eyo. Amen.

¹⁹⁸ Muhihoverye. Eyo ti yawinyu, moone. Eyo ti yawinyu. Eyo e—e Yolya y’ana.

¹⁹⁹ Mwaarina moonelo wotikiniha vakhani okathi wiiraly’aka, “muxankiho wa athiyana,” khimwaarina? Okhala wira ti yeeyo nyuwo mwaarin’anyu, nave. Vano munnaamini wira munrowa okhala sana naanaano va? Rowani, mwaaxukhuruku Apwiya paahi.

²⁰⁰ Ehali anyu? Munnaamini ni murim’anyu wothene? Munnaamini wira munoorowa owerya olya ntoko siirakaanyu khalayi? Vaareera. Rowani, mwiire, “Kooxukhuru, Pwiya. Kinnaamini.” Mukhalelo w’Apwiya.

²⁰¹ Munnaamini wira mukattyamiho owo wa muthana onoorowa woohiyani ni wira munoorowa okhala sana? Vaareera. Murowe paahi, mwiraka, “Kooxukhuru, Muluku ootthuneya,” nto Muluku onimoovahani.

²⁰² Munnaamini wira munoowerya okhala sana, Apwiya animoovonihani, ni khamunrowa wiipakaseya makhonyokhonyo, munookhala sana ni mukumi? Munnaamini yeeyo? Rowani, mwaaxukhuruku Yaawo, mwiire, “Pwiya, miyo kinnikupali ni murim’aka wothene, ni kinnaamini.”

Exeni nyuwo othene iwo munaamini anyu wa Yeela?

²⁰³ Nyuwo va, mmwiixaatherye ntata nanyu muthiyan’owo okilanthi vakhiviru ni nyuwo vo, mmuleele wira wiipa wawe mitika ni makhonyokhonyo sinoomuhiya. Okathi owo...?...

204 Muluku ooreeriheni. Munnaamini wira munoorowa okhala sana naanaano? Rowani owaani mukhale. Muluku ooreeriheni. Mutthareke ephiro anyu, mwiire, “Kooxukhuru, Pwiya Yesu.”

205 Ehali anyu? [Munna oniira, “Attottopeliwe Apwiya.”—Mol.] Munnaamini wira muxankiho w’athiyana onoorowa woohiyani, nave? [“Kinnaamini.”] Ni munoorowa okhala mukumi? [“Kooxukhuru, Yesu.”] Rowani, mwiire, “Kooxukhuru, Pwiya.” [“Kooxukhuru, Yesu.”]

206 Ehali anyu? [Munna oniira, “Kirimunteya eserewu.”—Mol.] Vano, wulu, wulu! [“Totten.”] Kinnisuwela nsina nanyu. Miyo—miyo kaani. . . [“Totten.”] okathi waahoolalaaka ekereja Patista. [“Totten.”] Totten. [“Della Totten.”] Munna Della Totten. Nyuwo munihaxeya ni mulattu wa muthana vano. [“Ayo.”] Onoorowa okhala sana, vano. Nyuwo munnaamini wira Owo onoorowa wookhalihani mukumi? [“Ayo.”] Munnuupuwela etthu yaakhumelenle ohitto iwe okereja Patista ya oMilltown miyakha sivinre? [“Ayo, kinnuupuwela ele!”] Owo nlelo Muluku mmosaru olelo. [“Oh, kinnimuxukhuru Muluku!”] Muluku ooreeriheni, murokor’aka.

George Wright, muri vai? Nyuwo munnuupuwela? Wulu, moota. . .

Nyuwo munnaamini wira, kiixaanthe-ru matata aka mwa nyuwo, ni mureeriho ola, munnaamini wira munookhala mukumi? Rwani nno. Mwa Nsina na Yesu Kristu ola avonihawe. Amen. Mwaamini!

Ahe, nyuwo othene munnaamini ni murim’anyu wothene? [Muthukumano onira, “Amen.”—Mol.]

207 Vano, moota oniruuhaaya miyuupuwelo sa khalayi, omoona muthiyari’ole! Nkinwerya-tho wuupuwela nsina nawe, nlelo, masi miyo. . . [Ookhala oniira, “Totten.”—Mol.] Totten. Totten, ti yeeyo. Oh, ayo, mwan’awe aari Bertie. Ti yeeyo. Vekeekhai. Muhuupuwele wira kiroovahuwa, kookhala vakhani paahi, nyuwo moosuwela, eri ntoko e. . . Nkinwerya otaphulela.

208 Masi mulattu wa muthana anyu woomala, muthiyana. Rowani, mwaattotopole Apwiya, mwiire, “Kooxukhuru, Pwiya.”

209 Munnaamini wira mukattyamiho wa murim’anyu onookhala sana, nave? [Muretta oniira, “Ayo.”—Mol.] Murowe paahi, muhakalale, mwiire, “Kooxukhuru, Pwiya Yesu,” ni mwaamini Yeeyo. Vaareera. Mwaamini vano. Muhihoverye.

210 Rwani, muhano. Munnaamini ni murim’anyu wothene? Mookhalana ithu sinci-ene sivonyeiye ni nyuwo. Mookhalana mukattyamiho wa muthana, nave. Munnaamini wira Muluku onoorowa woovonihani? Vaareera, murowe paahi, muhakalalaka. Yeeyo, ti Yoowo oniwoonihani siiso. Mwaaxukhuru Apwiya. Muluku ooreeriheni, munna.

211 Sai, mwana'ka. [Mmiravo oniira, "Sai!"—Mol.] Munnaamini wira Muluku onoorowa ovoniha ettetemeri ya mwaan'owo ni omukhalaha mukumi? Munnaamini? Vaareera. Sai, mpatthani, mukihye koovaheni mukhono.

212 Muluku Ootthuneya, mukumihe etthu iyo yootakhala mwa mmirav'ola, ni owo akhale mukumi ni akhale vootthuneya. Mwa nsina na Yesu. Amen.

213 Muluku ooreeriheni, munna. Nyuwo munnaamini yeeyo, khamunaamini? Munookhala sana. Muhihoverye nnakhala.

214 Khoreere okhala mmiravo wira awereiwe murima. Munnaamini wira Muluku onimookhalihani mukumi? [Mureta oniira, "Ayo, mulopwana."—Mol.] Rowani, mwiire, "Kooxukhuru, Pwiya, mwaha wo okivoniha."

215 Munnaamini wira Muluku onoovoniha mulattu wa nipwiiwpi ni wookhalihani mukumi? Muroweke, muhakalaleke, mwiire, "Kooxukhuru, Pwiya."

216 Owo nlelo Mulukuu, kahiyo? [Muthukumano onira, "Amen."—Mol.] Etthu emosa paahi entthuneya nyuwo wira waamini paahi. Kahi siiso? Munnimwaamini Mwana a mutthu mahiku ookiserya?

217 Yookhala etthu emosa ekhumelenle va minutu vakhani sivinre, nto miyo nkinwerya... kiphavelaka osuwela waari vatthu xeni. Ookhala mutthu aaminni khwira etthu. Ahiso, alakela kinimwaaphwanya Ettiminku enirwa, wala kawerya vale. Nyuwo muri—nyuwo... Ele vale tho. Nyuwo nvenxale ntata. Munnaamini wira Muluku onniwerya ovoniha mukattiyamiho owo wa murima, wookhalihani mukumi, onvoniha mwan'inyu mwaamuthiyana ole vale ni—ni... Munnaamini? Muhano Neff, munnaamini wira Muluku... Leo Neff. Miyo nkinoosuwelani, masi nyuwo mwa yoowo. Nyuwo murina mukattiyamiho wa murima, ni mwan'inyu mwamuthiyana orina mukattiyamiho wa isyo. Munnaamini wira owo onoorowa okhala mukumi? Waamini wanyu onnoovonihani. Mwaamini ni murim'anyu wothene.

218 Nyuwo ottuli iwo mutankini, mweemenle ottuli iwo ni munwereiwa mmirimani, Yesu Kristu onnoovonihani.

219 Munnamini? [Muthukumano onira, "Amen."—Mol.] Owo mmosaru nsana, olelo, ni mahiku othene. Nrowe niixaatheryane matata mmosa ni mukhw'awe vano. Oh, muupuwele okathi ory'ahu, muupuwele okathi. Muupuwele wira hiyo nri Ohoolo wa Yesu Kristu, Mwana a Muluku. Owo aahihimya wira aamwiira yeela mahiku ookiserya. Miyo kihixatherya matata maleso ala.

220 Muluku Ootthuneya, miyo kinvekela wira Nyuwo mureerihe maleso ala wira sivonihiwe irutthu s'atthu, mwa Nsina Yesu Kristu.

221 Vano, ni matata anyu vasulu mmosa ni mukhw'awe, khula mmosa a nyuwo mutthu a Erutthu ya Kristu. Eroho Yowarya emosaru ehimnye wuupulula isiiri sa mmurimani ni wira itthu iya, Eyo eri mwa nyuwo. Nyuwo mwa epantte a Yoowo, ni Owo epantte a nyuwo. Vano, Owo oohimya ela, "Miirirya iya sinimwaathara ale anaamini." Owo ti nyuwo. "Awo yawiixaatherya matata aya aretta, awo anoovona." Vano, muhiivekelele mmansinyu, mmuvekelele ole omwiixaathenry'anyu matata, 'okhala wira awo anoovekelelani nyuwo. Vano nrowe nivekele hothe, ni wira ohikhale hata mutthu ootteettheya mpaani mu. Naarowa olipelela tho mwaha wa xeni, munn'aka oophentiwa mulopwana, muthiyana, Eyo eri vaava, Eroho Yowarya, Muluku, vaava va, Etthu ene yeeyo hiyo elavunly'ahu.


222 Yesu Ootthuneya, hiyo ninnoona Mukhalelo Anyu. Nyuwo mwaahimuhokoloxerya mwanamwane ole mw'ekumini nihiku nlo, vaamanly'awe okhwa, ni mavekelo o waamini. Muluku Ootthuneya, aakhala anci-ene va hiyo ohaaphiyenry'ahu, okathi onoovira, masi awo ahiixatheeryana matata mmosa ni mukhw'awe. Awo atthu oowaamini. Hiyo nikilanthi Ohoolo wa Pwiya Yesu Kristu, ohihimunwe mookhwaani, mmosaru nsana, olelo, ni mahiku othene.

223 Satana, nyuwo mooxinttiwa! Yesu Kristu ohooxinttani! Owo oohihimuwa mookhwaani ni omphwanyaneya eriyari ahu ohiy'ula, olipiheryaka Mutthak'ola wa mahiku ookiserya. Mwaakhume atthu ala! Mwaahiye, mwa Nsina na Yesu Kristu! "Mwa Nsina Naka awo anoowoomola axetwani," nto nyuwo muhoomoliwa. Mwa Nsina na Yesu Kristu, muhiye muthukuman'ola!

224 Khula mmosa a nyuwo vano mukupanli ovona wanyu, nvenye mweemele. Othene ale ankupali ovonihiwa, nvenye mweemele. Nvenxe matata anyu vano mmuttotopele Yoowo!

"Miyo vano kinnikupali ovona waka," mmuleele yeeyo Muluku. Miyo vano kinnikupali ovona waka. [Muthukumano onira, "Miyo vano kinnikupali ovona waka."—Mol.] Nyuwo mwa mmosaru nsana, olelo, ni mahiku othene, Kristu. [Nyuwo mwa mmosaru nsana, olelo, ni mahiku othene, Kristu."] Miyo vano kinniwaaminini Nyuwo. ["Miyo vano kinniwaaminini Nyuwo."] Nyuwo mukikhaliherye mwaha wo ohaamini waka. ["Nyuwo mukikhaliherye mwaha wo ohaamini waka."] Amen. ["Amen."]

Kinoomuttotoopela Yoowo, kinoomuttotopela
Yoowo,
Mmuttotopele Mwaapwittipwitthi iiviwe
mwaha w'anatampi;
Mmuwuwihe Yoowo, atthu othene,
Maana Ephome Awe yoorapiha khula nlepa.

²²⁵ Nyuwo khamunimpenta Owo? [Muthukumano onira, "Amen."—Mol.] Nrowe nimuttototopele Yoowo nto. Atthu othene, ni matata anyu osulu, mmuttototopele Yoowo, okathi munna onrw'awe va wira anilaxerye. 

YOLYA YA EROOHO M'OKATHI AYA EMK65-0718E
(Spiritual Food In Due Season)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yettaka 18 mweri wa Julho, 1965, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org